

摘藻堂四庫全書薈要

史部

欽定四庫全書薈要卷五千八百八十九

史部

宋史卷二百六十一

元中書右丞相總裁托克托等修

列傳第二十

李瓊

郭瓊

陳承昭

李萬超

白重贊

王仁鎬

陳思讓

孫若拙

焦繼勲

子守節

劉重進

袁彥

祁廷訓

張鐸

李萬全

田景咸  
王暉附

李瓊字子玉幽州人祖傳正涿州刺史父英涿州從事瓊幼好學涉獵史傳挾策詣太原會唐莊宗屬募勇士即應募與周祖等十人約為兄弟一日會飲瓊熟視周祖知非常人因舉酒祝曰凡我十人龍蛇混合異日富貴無相忘苟渝此言神降之罰皆刺臂出血為誓周祖與瓊情好尤密嘗造瓊見其危坐讀書因問所讀何書瓊曰此閭外春秋所謂以正守國以奇用兵較存亡治亂記賢愚成敗皆在此也周祖令讀之謂瓊曰兄當教

我自是周祖出入常袖以自隨遇暇輒讀每問難瓊謂  
瓊為師及討河中乃解瓊兵籍令叅西征軍事賊平表  
於朝授朝散大夫大理司直歲中遷太子洗馬周祖鎮  
鄴表為大名少尹廣順初拜將作監充內作坊使賜金  
紫連知毫陝二州改濟州刺史世宗初遷洺州團練使  
改安州防禦使治郡寬簡民請立碑頌德詔中書舍人  
竇儀撰文賜之宋初召為太子賓客建隆三年上章請  
老改右騎衛上將軍致仕瓊信釋氏明年四月八日詣

佛寺遇疾歸至暮卒年七十三贈太子少師

郭瓊平州盧龍人祖海本州兩治使父令奇盧臺軍使瓊少以勇力聞事契丹為蕃漢都指揮使後唐天成中挈其族來歸明宗以為亳州團練使改刺商州遷原州清泰初移階州城壘未葺蜀人屢寇瓊患之因徙城保險民乃無患受詔攻文州拔二十餘砦生擒數百人晉天福中移刺警州屬羌渾騷動朔方節度張希崇表瓊為部署將兵共討平之連領滑坊虢衛四州開運初為

北面騎軍排陣使陽城之役戰功居多改沂州刺史充  
荊口砦主兼東面行營都虞候擒莫州刺史趙思以獻  
改刺懷州俄為北面先鋒都監契丹陷中原盜賊蠭起  
山東為甚契丹主命瓊復刺沂州以禦盜瓊即日單騎  
赴郡盜聞瓊威名相率遁去漢乾祐中淮人攻密州以  
為行營都部署未至淮人解去會平盧節度劉銖恃佐  
命之舊稱疾不朝將相大臣懼其難制先遣瓊與衛州  
刺史郭超以所部兵屯青州銖不自安置酒召瓊伏壯

士幕下欲害瓊瓊知其謀屏去從者從容就席略無懼色銖不敢發瓊因為陳禍福銖感其言遂治裝俄詔至即日上道瓊改潁州團練使又加防禦使時朗州結荆淮廣南合兵攻湖南詔瓊以州兵合王令溫大軍攻光州尋以內難不果罷歸朝遣詣河北計度兵甲芻糧周祖祀南郊召權知宗正卿事世宗征劉崇為北面行營都監歷絳蔡齊三州防禦使在齊州民饑瓊以已俸賑之人懷其惠相率詣闕頌其德政詔許立碑宋建隆三

年告老加右領軍衛上將軍致仕歸洛陽乾德二年卒  
年七十二瓊雖起卒伍而所至有惠政尊禮儒士孜孜  
樂善蓋武臣之賢者也

陳承昭江表人始事李璟為保義軍節度周世宗征淮  
南璟以承昭為濠泗楚海水陸都應援使世宗既拔泗  
州引兵東下命太祖領甲士數千為先鋒遇承昭於淮  
上擊敗之追至山陽北太祖親禽承昭以獻世宗釋之  
授右監門衛上將軍賜錦袍銀帶改右領軍衛上將軍



分司西京宋初入朝太祖以承昭習知水利督治惠民  
五丈二河以通漕運都人利之建隆二年河成賜錢三  
十萬承昭言其壻王仁表在南唐帝為致書於李璟令  
遣歸闕歷左右神武統軍四年春大發近甸丁壯數萬  
修畿內河堤命承昭董其役又令督諸軍子弟數千鑿  
池於朱明門外以習水戰從征太原承昭獻計請壅汾  
水灌城城危甚會班師功不克就乾德五年遷右龍武  
軍統軍開寶二年卒年七十四贈太子太師中使護喪

大中祥符元年錄其孫宗義為三班借職

李萬超并州太原人幼孤貧負販以養母晉祖起并門  
萬超應募隸軍籍戰累捷稍遷軍校從李守貞討楊光  
遠於青州奮勇先登飛石中其腦氣不屬者久之開運  
中從杜重威拒契丹於陽城流矢貫手萬超拔矢復戰  
神色自若以功遷肅銳指揮使契丹入中原時萬超以  
本部屯潞州主帥張從恩將棄城歸契丹會前驍衛將  
軍王守恩服喪私第從恩即委以後事遁去及契丹使

至專領郡務守恩遂無所預萬超奮然謂其部下曰我輩垂餌虎口苟延旦夕之命令欲殺使保其城非止逃生亦足建勲業汝曹能乎衆皆躍然喜曰敢不唯命遂率所部大譟入府署殺其使推守恩為帥列狀以聞漢祖從其請仍命史弘肇統兵先渡河至潞見萬超語之曰得復此州公之力也吾欲殺守恩以公為帥可乎萬超對曰殺契丹使以推守恩蓋為社稷計爾今若賊害於人自取其利非宿心也弘肇大奇之表為先鋒馬步

軍都指揮使路經澤州刺史翟令奇堅壁拒命萬超馳至城下諭之曰今契丹北遁天下無主并州劉公仗大義定中土所向風靡後服者族盍早圖之令奇乃開門迎納弘肇即留萬超權州事漢祖遂以為刺史及征李守貞以萬超為行營壕砦使河中平拜懷州刺史周祖開國從征慕容彥超又為都壕砦使以功授洺州團練使預收秦鳳改萊州從平淮南連移蘄登二州所至有善政屬有詔重均田租前年平令馬陶籍隸文登縣隱

苗不通命繫之將斬而後聞陶懼遁去由是境內肅然  
宋初入為右武衛大將軍遷左驍衛大將軍開寶八年  
卒年七十二

白重贊憲州樓煩人其先沙陁部族重贊少從軍有武  
勇漢初自散員都虞候三遷護聖都指揮使乾祐中李  
守貞據河中叛隱帝以重贊為行營先鋒都指揮使河  
中平以功領端州刺史周初轉護聖左廂都指揮使未  
幾出為鄭州防禦使改相州留後廣順中授義成軍節

度在鎮日河屢決重贊親部丁壯塞大程六合二堤詔書褒美世宗征劉崇以重贊為河東道行營馬軍都指揮使重贊與李重進居陣西偏樊愛能何徽居陣東偏既合戰愛能與徽皆遁走惟重贊與重進率所部力戰世宗自督親軍合勢薄之并人大敗既誅愛能等重贊以功授保大軍節度使及世宗征太原以河陽劉詞為隨駕都部署命重贊副之其忻州監軍殺刺史趙皋及契丹大將楊耨姑以城降而契丹兵猶盛命重贊及符

彥卿擊走之世宗還京改河陽三城節度檢校太尉及  
征淮南命重贊率親兵三千軍于潁上未幾改淮南道  
行營馬步軍都虞候俄遷彰義軍節度宋初加檢校太  
師改鎮涇州有馬步軍教練使李玉本燕人克狡與重  
贊有隙遂與部下閻承恕謀害重贊密遣人市馬纓以  
造制書云重贊構逆令夷其族乃自持偽制并馬纓以  
告都校陳延正曰使者致而去矣延正具白重贊重贊  
封其書以聞太祖大駭令驗視之率皆誕謬遂命六宅

使陳思誨馳赴涇州禽王及承恕鞠問伏罪棄市延正  
擢領刺史以賞之仍詔諸州凡被制書有關機密則詳  
驗印文筆迹俄改泰寧軍節度乾德四年又為定國軍  
節度開寶二年改左千牛衛上將軍奉朝請三年卒年  
六十二

王仁鎬邢州龍岡人後唐明宗鎮邢臺署為牙校即位  
擢為作坊副使累遷西上閤門使清泰中改右領軍衛  
將軍晉天福中青州楊光遠將圖不軌以仁鎬為節度



副使伺其動靜歷二年或譖仁鎬于朝改護國軍行軍司馬仁鎬至河中數月光遠反書聞漢乾祐中歷昭義天雄二軍節度副使周祖鎮鄴表仁鎬為副留守及起兵仁鎬預其謀周祖即位仁鎬為王峻所忌出為唐州刺史遷棣州團練使入為右衛大將軍充宣徽北院使兼樞密副使顯德初出為永興軍節度使世宗嗣位移河中會殿中丞上官瓚使河中還言河中民多匿田租遂遣瓚按視均定百姓苦之多逃亡他郡仁鎬抗論其

事廼止丁繼母憂去官五年拜安國軍節度制曰眷惟  
襄國實卿故鄉分予龍節之權成爾錦衣之美郡民扶  
老携幼迎於境上有獻錦袍者四仁鎬皆重衣之厚酬  
以金帛視事翌日省其父祖之墓周視松檟涕泗嗚咽  
謂所親曰仲由以為不如負米之樂信矣時人美之郡  
有羣盜仁鎬遣使遺以束帛諭之悉遁去不復為盜恭  
帝嗣位移山南東道節度宋初加檢校太師建隆二年  
以疾召還次唐州卒於傳舍年六十九仁鎬性端謹儉

約崇信釋氏所得俸祿多奉佛飯僧每晨誦佛經五卷  
或至日盥方出視事從事劉謙責仁鎬曰公貴為藩侯  
不能勤恤百姓孜孜事佛何也仁鎬斂容遜謝無愠色  
當時稱其長者

陳思讓字後已幽州盧龍人父審確仕後唐至晉歷檀  
順涿均沁唐祁城八州刺史預征蜀權利州節度終金  
州防禦使思讓初隸莊宗帳下即位補右班殿直晉天  
福中轉東頭供奉官再遷作坊使安從進叛於襄陽以

思讓為先鋒右廂都監從武德使焦繼勲領兵進討遇從進之師於唐州花山下急擊大破之從進僅以身免以功領獎州刺史從進平授坊州刺史八年冬契丹謀入寇以思讓監澶州軍賜鞍勒馬器帛討楊光遠於青州也又為行營右廂兵馬都監兵罷改磁州刺史會符彥卿北征契丹思讓表求預行未幾改衛州連丁內外艱時武臣罕有執喪禮者思讓不俟詔去郡奔喪聞者嘉之起復隨州刺史漢初移淄州罷任歸朝會淮南與

朗州馬希萼合兵淮南攻湖南馬希廣來乞師旋屬內  
難又周祖北征乃分兵令思議往郢州赴援兵未渡而  
希廣敗思議留於郢周祖即位遣供奉官邢思進召思  
讓及所部兵還劉崇僭號太原周祖思得方略之士以  
備邊遣思議率兵詣磁州控扼澤潞未幾授磁州刺史  
充北面兵馬巡檢未行陞磁州為團練即以思議充使  
廣順元年九月劉崇遣大將李瓌領馬步軍各五都鄉  
兵十都自團栢軍於鷓子店思議與都監向訓張仁謙

等率龍捷吐渾軍至虎亭西與環軍遇殺三百餘人生禽百人獲崇偏將王璠曹海金馬五十匹俄遣王峻援晉州以思議與康延昭分為左右廂排陣使令率軍自烏嶺路至絳州與大軍合崇燒營遁去思議又與藥元福襲之俄命權知絳州明年春遷絳州防禦使顯德元年九月改亳州防禦使充昭義軍兵馬鈐轄屢敗并人及契丹援兵遷安國軍節度觀察留後充北面行營馬步軍排陣使五年敗并軍千餘於西山斬五百級是

秋邢州官吏耆艾邢銖等四十人詣闕求借留思讓詔  
褒之十二月改義成軍節度觀察留後六年春世宗將  
北征命先赴冀州以俟命及得瓦橋關為雄州命思讓  
為都部署率兵戍守世宗不豫還京留思讓為關南兵  
馬都部署恭帝嗣位授廣海軍節度宋初加檢校太傅  
乾德二年又為保信軍節度時皇子興元尹德昭納思  
讓女為夫人開寶二年夏改護國軍節度河中尹七年  
卒年七十二贈侍中思讓累歷方鎮無敗政然酷信釋

氏所至多禁屠宰奉祿悉以飯僧人目為陳佛子身沒之後家無餘財弟思誨至六宅使子欽祚累遷至香藥庫使長州刺史欽祚子若拙

若拙字敏之幼嗜學思讓嘗令持書詣晉邸太宗嘉其應對詳雅將縻以軍職若拙懇辭太平興國五年進士甲科解褐將作監丞通判鄂州改太子右贊善大夫知單州以能政就改太常丞遷監察御史充鹽鐵判官益州繫囚甚衆太宗覽奏訝之召若拙面諭委以疏決遷



殿中侍御史通判益州淳化三年就命為西川轉運副使未幾改正使召歸會李至守洛都表若拙佐治改度支員外郎通判西京留司久之柴禹錫鎮涇州復奏為通判遷司封員外郎部送芻糧至塞外優詔獎之入為鹽鐵判官轉工部郎中與三司使陳恕不協求徙他局改主判開拆司車駕北巡命李沆留守東京以若拙為判官河決鄆州朝議徙城以避水患命若拙與閻承翰往規度尋命權京東轉運使因發卒塞王陵口又於齊

州浚導水勢設巨隄於采金山奏免六州所科梢木五  
百萬民甚便之河平真授轉運使召還拜刑部郎中知  
潭州時三司使缺若拙自謂得之及是大失望因請對  
言父母年老不願遠適求納制命上怒謂宰相曰士子  
操修必須名實相副頗聞若拙有能幹特遷秩委以藩  
任而貪進擇祿如此往有黃觀者或稱其能選為西川  
轉運使輒訴免當時黜守遠郡今若拙復爾亦須譴降  
凡用人豈以親疎為間苟能盡瘁奉公有所樹立何患

名位之不至也乃追若拙所投告敕黜知處州徙温州  
代還復授刑部郎中再為鹽鐵判官改兵部郎中河東  
轉運使賜金紫會親祀汾陰若拙以所部緡帛芻粟十  
萬輸河中以助費經度制置使陳堯叟言其幹職擢拜  
右諫議大夫徙知永興軍府時鄰郡歲饑前政拒其市  
糴若拙至則許貿易民賴以濟又移知鳳翔府入拜給  
事中知澶州蝗旱之餘勤于政治郡民列狀乞留天禧  
二年卒年六十四錄其子映為奉禮郎若拙多誕妄寡

學術當時以第二人及第者為膀眼若拙素無文故目為瞎膀云

焦繼勲字成績許州長社人少讀書有大志嘗謂人曰大丈夫當立功異域取萬戶侯豈能孜孜事筆硯哉遂棄其業游三晉間為輕俠以飲博為務晉祖鎮太原繼勲以儒服謁見晉祖與語悅之留帳下天福初授皇城兼宮苑使遷武德使安重榮反鎮州安從進自襄陽舉兵為應晉祖命繼勲督諸將進討至唐州南遇從進軍

萬餘設伏擊敗之禽其牙將安洪義鮑洪等五十餘人  
得山南東道印從進單騎奔還從進弟從貴率兵千餘  
人援均州刺史蔡行遇繼勲殺其衆七百生禽百獲從  
貴斷腕放入城中從進自此不能復鎮繼勲以功就拜  
齊州防禦使少帝即位從進平藉繼勲威名鎮之徙襄  
陽防禦使歲餘入為右千牛衛大將軍拜宣徽北院使  
遷南院使西人寇邊朝議發師致討繼勲抗疏請行拜  
秦州觀察使兼諸蕃水陸轉運使既至推恩信設方略

招誘諸郡酋長相率奉玉帛牛酒乞盟邊境以安俄徙  
知陝州就遷保義軍兵馬留後漢初鳳翔軍校陽彥昭  
據城叛命繼勲率師討之以功授保大軍節度召入會  
漢祖幸大名留為京城右廂巡檢使俄改右羽林統軍  
隱帝末命繼勲領兵北征及周祖舉兵向闕繼勲奉隱  
帝逆戰于留子陂戰不利遂歸周祖廣順初改右龍武  
統軍世宗征淮南為左廂排陣使又改右羽林統軍將  
軍左屯衛上將軍以戰功拜彰武軍節度宋初召為右

金吾衛上將軍改右武衛上將軍乾德三年權知延州  
四年判右街仗杜審瓊卒命繼勲代之時向拱為西京  
留守多飲燕不省府事羣盜白日入都市劫財拱被酒  
不出捕逐太祖選繼勲代之月餘京城肅然太祖將幸  
洛遣莊宅使王仁珪內供奉官李仁祚部修洛陽宮命  
繼勲董其役車駕還嘉其幹力召見褒賞以為彰德軍  
節度仍知留府事仁珪領義州刺史仁祚為八作副使  
繼勲以太平興國三年卒年七十八贈太尉繼勲獵涉

史傳頗達治道所至有善政然性吝嗇多省公府用度  
時論少之子守節

守節字秉直初補左班殿直選為江淮南路採訪還奏  
稱旨擢閤門祇候李順餘黨擾西川令與上官正討平  
之高溪州蠻內寇又命往圖方略守節言山川回險非  
我師之利詔許招納咸平中置江淮南荆湖路兵馬都  
監首被選擢又討施夔州叛蠻以大義諭其酋長皆悔  
過內附因為之畫界定約還遷閤門通事舍人監香藥



權易院三司言歲課增八十餘萬時守節已為衣庫副使當遷閤門副使真宗謂輔臣曰守節緣財利羨餘而遷橫行何以勸邊陲効命者止以為宮苑副使奉使契丹館伴丁求說指遠山謂曰此黃龍府也守節應聲曰燕然山距此幾許求說慙服久之遷皇城副使管勾軍頭引見司坐以白直假樞密院副承旨尹德潤治第免所居官三遷東上閤門使加榮州刺史數請補外歷知襄鄧汝三州遷四方館使以右神武大將軍致仕卒

劉重進幽州人本名晏僧梁末隸軍籍晉初以習契丹語應募使北邊改右班殿直因賜是名遷西頭供奉官再使契丹契丹主以其敏慧留為帳前通事俄南侵署重進忠武軍節度漢初移鎮鄧州漢法禁牛革甚嚴州民崔彥陳寶選八人自本鎮持革詣漢祖廟鞞鼓重進杖遣之判官史在德謂重進不善用法宜置極典及大理刑部詳覆重進所斷為是在德坐故入杖死之乾祐末罷鎮來朝周祖起兵至封邱詔重進與左神武統軍

袁義率兵拒之重進望塵退走周廣順初從征兗州未  
幾封薛國公俄召為右神武統軍累加檢校太師世宗  
南征為右廂排陣使顯德三年世宗聞揚州無備遣宣  
祖韓令坤與重進等往襲取之又為先鋒都部署進克  
泰州初楊行密子孫居海陵號永寧宮周師渡淮盡為  
李景所殺重進入其家得玉硯玉杯盤水晶盞碼碯盃  
翡翠瓶以獻俄命判廬州行府事兼行營都部署敗淮  
人千餘于州境又敗五百衆于白城湖及世宗再巡吳

師潰于紫金山有至東山口者重進殺三千餘衆及下  
壽州以功授武勝軍節度淮南平改鎮邠州世宗北征  
為先鋒都指揮使恭帝即位封開府宋初進封燕國公  
建隆二年秋授右羽林統軍乾德五年改左領軍衛上  
將軍重進徒善譯語無他才能值契丹入中原遂至方  
鎮及在環衛嘗從幸玉津園太祖召與語既退謂左右  
曰觀重進應對不逮常人前朝以為將帥何足重耶六  
年卒年七十

袁彥河中河東人少以趨勇應募從事隸奉國營漢乾  
祐中周祖領軍討李守貞以彥置麾下及鎮鄴以為部  
直小將周廣順中世宗在澶淵遷為親事都校世宗尹  
京改開封府步直指揮使顯德初授內外步軍都軍頭  
領泉州刺史未幾改岳州防禦使從征壽州為城北造  
竹龍都部署竹龍者以竹數十萬竿圍而相屬上設版  
屋載甲士數百人以攻其城又命於渦口修橋橋成世  
宗幸焉因立為鎮淮軍李繼勲以淮上失律罷軍職命

彥為武信軍節度權侍衛步軍都指揮使又命為淮南道行營馬步軍副都指揮使賜衣服金帶鞍勒馬鎧甲器仗遣赴軍前太祖下滁陽禽皇甫暉姚鳳彥皆有勞績詔褒之又令率師屯下蔡以逼壽春及劉仁贍降從世宗攻濠泗又禽南唐將許文績邊鎬等以獻師還真授步軍都指揮使領彰信軍節度六年春發近畿丁壯浚五丈河命彥董其役恭帝嗣位移保義軍節度宋初加檢校太尉是秋來朝改鎮曹州乾德六年為靜難軍

節度開寶二年移鄜州五年罷鎮歸闕卒年六十六景德四年特詔錄其孫昭慶為借職大中祥符八年昭慶上彥周朝所授告敕有二聖名諱者特遷殿直

祁廷訓本名廷義避太宗舊名改焉河南洛陽人父珪梁左監門衛大將軍廷訓善書計騎射隸周祖帳下廣順中歷東西班右蕃行首鐵騎都虞候世宗即位改東西班都指揮使遷內殿直都指揮使繼領蘭睦二州刺史從征淮南賜以明光細甲令董舟師巡江界吳人伏

兵三江口葭荻中掩擊廷訓廷訓力戰大破之俘馘千人餘黨遁去江北平以功遷吉州團練使領鐵騎左廂都指揮使月餘遷嵐州防禦使領龍捷右廂都指揮使宋初為安遠軍節度觀察留後是秋改河陽乾德二年又改彰德軍節度留後俄權知鄧州五年就拜義武軍節度開寶二年太祖征太原以廷訓為北面副都部署太平興國元年來朝二年冬改左領軍衛上將軍五年坐私販竹木貴鬻入官責本衛大將軍未幾復舊官六



年卒年五十八廷訓形質魁岸無才略臨事多規避時人目為祁縶馳以其龐大而無所取也

張鐸河朔人少以才武應募隸軍籍漢初為奉國右第六軍都指揮使領澧州刺史周祖以樞密使鎮鄴鐸以所部從行及起兵鐸預焉廣順初鐸為奉國左廂都指揮使韓通為右廂都指揮使俄並兼防禦使鐸領永州通領睦州會改奉國為虎捷鐸仍領其職是冬出為密州防禦使改亳州三年授鎮國節度郊祀畢加檢校太

傳世宗初移彰義軍未幾加檢校太尉顯德三年又移河中尹護國軍節度宋初加檢校太師俄復鎮涇州州官歲市馬鐸厚增其直而私取之累至十六萬貫及擅借公帑錢萬餘緡侵用官麴六千四百餅事發召歸京師本州械繫其子保常及親吏宋習太祖以鐸宿舊釋不問罷鎮為左屯衛上將軍奉朝請而已其所盜用仍蠲除之保常習亦得釋鐸又嘗假晉邸錢百六十萬太宗即位詔貫之俄命判左金吾街仗及駕征河東以鐸

為京城內外都巡檢鄜州刺史高繼充閑廐副使張守  
明分為裏城左右廂巡檢雍熙三年卒年七十二贈太  
傅子熙載至左千牛衛大將軍熙載子禹珪字天錫粗  
知書有方略幼事太宗藩邸即位補東西班承旨改殿  
直帶御器械以材勇擢居禁衛殿前散祇候都虞候咸  
平初授內殿直都虞候領恩州刺史三年出為滁州刺  
史知洺瀛霸三州並兼兵馬鈐轄徙嵐州西人勒厥麻  
誘衆叛禹珪率衆討之俘六千餘人獲名馬孳畜其衆

景德初授高陽關行營副都部署契丹既請和帝思守  
臣有武幹能鎮靜邊郡者親錄十餘人名付中書禹珪  
預焉遂知石州徙代兗州又移澶州頗勤政治以瑞麥  
生獄空連詔嘉獎會河堤決溢禹珪率徒塞之宰相王  
旦使兗州還言其狀優詔褒之就拜洺州團練使尋知  
廣信軍天禧初復為高陽關副都部署兼知瀛州明年  
召還將授四廂之職卒年五十九錄其二子

李萬全吐谷渾部人善左右射隸護聖軍為騎士累遷

至本軍都校與田景咸王暉等從周祖入汴號十軍主  
顯德中為彰武軍節度宋初加檢校太尉橫海軍節度  
乾德中代歸太祖數召於苑中宴射萬全無將略惟挽  
強弓老而不衰帝亦以此賞之


田景咸王暉皆太原人景咸仕漢為奉國右廂都校從  
周祖入汴為龍捷左廂都校改安國軍留後俄真拜陞  
本軍節度世宗時拜武勝軍節度宋初為左驍衛上將  
軍開寶三年卒景咸性鄙吝務聚斂每使命至惟設肉

一器賓主共食後罷鎮常忽忽不樂妻識其意引景咸徧閱囊儲景咸方自釋在邢州日使者王班至景咸勸班酒曰王班請滿飲典客曰是使者姓名也景咸悟曰我意王班是官爾何不早諭我聞者笑之暉性亦吝嗇貲甚富而妻子飯疏糲縱部曲誅求民甚苦之世宗以先朝功臣知而弗問焉至右神武統軍建隆四年終右領軍上將軍

論曰太祖事漢周同時將校多聯事兵間及分藩立朝

位或相亞宋國建皆折其猛悍不可屈之氣俛首改事  
且為盡力焉揚雄有言御之得其道則狙詐咸作使此  
太祖之英武而為創業之君也歟

宋史卷二百六十一



總校官庶吉士臣張能照

校對官庶吉士臣陳崇本

謄錄監生臣楊邦彥



欽定四庫全書薈要

史部

宋史卷二百六十二

詳校官編修臣王天祿



欽定四庫全書薈要卷五千八百九十

史部

宋史卷二百六十二

元中書右丞相總裁托克托等修

東坡先生傳第二十一

李穀

咎居潤

竇貞固

李濤

弟澣  
孫仲容

王易簡

趙上交

子曦

張錫

張鑄

邊歸謙

劉溫叟

子煜  
孫几

劉濤

邊光範

劉載

程羽

李穀字惟珍潁州汝陰人身長八尺容貌魁偉少勇力  
善射以任俠為事頗為鄉人所困發憤從學所覽如宿  
習年二十七舉進士連辟華泰二州從事晉天福中擢  
監察御史少帝領開封尹以穀為太常丞充推官晉祖  
幸鄴少帝居守加穀虞部員外郎仍舊職少帝為廣晉  
尹穀又為府推官及即位拜職方郎中俄充度支判官  
轉吏部郎中罷職天福九年春少帝親征契丹詔許扈  
從充樞密直學士加給事中為馮玉李彥韜所排會帝

再幸河北改三司副使權判留司三司事開運二年秋  
出為磁州刺史北面水陸轉運使契丹入汴少帝蒙塵  
而北舊臣無敢候謁者穀獨拜迎於路君臣相對泣下  
穀曰臣無狀負陛下因傾囊以獻會契丹主發使至州  
穀禽斬之密送款於漢祖潛遣河朔酋豪梁暉入據安  
陽契丹主患之即議北旋會有告契丹以城中虛弱者  
契丹還攻安陽陷其城穀自郡候契丹遂見獲契丹主  
先設刑具謂之曰爾何背我歸太原穀曰無之契丹主

因引手車中似取所獲文字而穀知其詐因請曰如實  
有此事乞顯示之契丹國制人未伏者不即寘死自後  
凡詰穀者六次穀詞不屈契丹主病且曰我南行時人  
云爾謂我必不得北還爾何術知之今我疾甚如能救  
我則致爾富貴穀曰實無術蓋為人所陷耳穀氣色不  
撓卒寬之俄而德光道殂永康繼立署穀給事中時契  
丹將麻荅守真定而李崧和凝與家屬皆在城中會李  
筠何福進率兵逐麻荅推護聖指揮使白再榮權知留

後再榮利崧等家財令甲士圍其居以求賂既得之復欲殺崧等滅口穀遽見再榮謂之曰今國亡主辱公輩握勁兵不能死節雖逐一契丹將城中戰死者數千人非獨公之力也一朝殺宰相即日中原有主責公以專殺其將何辭以對再榮甚懼崧等獲免漢初入拜左散騎常侍舊制罷外郡歸本官至是進秩獎之也俄權判開封府時京畿多盜中牟尤甚穀誘邑人發其巢穴有劉德輿者梁時屢攝畿佐居中牟素有幹材穀即署攝

本邑主簿浹旬穀請侍衛兵數千佐德興悉禽賊黨其魁一即縣佐史一御史臺吏搜其家得金玉財貨甚衆自是行者無患俄遷工部侍郎周祖西征為西南面行營水陸轉運使關右平改陳州刺史會有內難急召赴闕周祖兵入汴命權判三司廣順初加戶部侍郎未幾拜中書侍郎平章事仍判三司初漢乾祐中周祖討河中穀掌轉運時周祖已有人望屬漢政紊亂潛貯異志屢以諷穀穀但對以人臣當盡節奉上而已故開國之

初倚以為相是歲淮陽吏民數千詣闕請立生祠許之  
穀懇讓得止先是禁牛革法甚峻犯者抵死穀乃校每  
歲用革之數凡田十頃歲出一革餘聽民私用又奏罷  
屯田務以民隸州縣課役盡除宿弊穀父祖本居河南  
洛陽經巢之亂園廬蕩盡穀生於外既貴訪得舊地建  
蘭若又立垣屋凡族人之不可仕者分田居之詔改清  
風鄉高陽里為賢相鄉勲德里二年晨起仆階下傷右  
臂在告旬中三上表辭相位周祖不允免朝叅視事本



司賜白藤肩輿召至便殿勉諭穀不得已起視事征克  
州為東京留守判開封府事顯德初加右僕射集賢殿  
大學士從世宗征太原遇賊於高平匿山谷中信宿而  
出追及乘輿世宗慰撫之世宗將趨太原命穀先調兵  
食又代符彥卿判太原行府事師還進位司空門下侍  
郎監修國史穀以史氏所述本於起居注喪亂以來遂  
廢其職上言請令端明樞密直學士編記言動為內廷  
日歷以付史官是歲河大決齊鄆發十數州丁壯塞之

命穀領護刻期就功二年冬議伐南唐以穀為淮南道  
行營前軍都部署兼知廬壽等州行府事忠武軍節度  
王彥副之韓令坤以下十二將率從穀領兵自正陽渡  
淮先鋒都將白延遇敗吳軍數千于來遠又破千餘人  
于山口鎮進攻上窰又敗千餘衆獲其小校數十人長  
圍壽春南唐遣大將劉彥貞來援穀召將佐謀曰今援  
軍已過來遠距壽陽二百里舟楫將及正陽我師無水  
戰之備萬一斷橋梁隔絕王師則腹背受敵矣不如退

守淳梁以待戎輅之至初世宗至圍鎮已聞此謀亟走  
內侍乘驛止之穀已退保正陽仍焚芻糧回軍之際遽  
相掠奪淮北役夫數百悉陷于壽春世宗聞之怒亟命  
李重進率師伐之以穀判壽州行府是秋詔歸闕得風  
痺疾告滿百日累表請致仕優詔不允每軍國大事令  
中使就第問之四年春吳人壁紫金山築甬道以援壽  
春不及留數年師老無功時請罷兵為便世宗令范質  
王溥就穀謀之穀手疏請親征有必勝之利者三世宗

大悅用其策及淮南平賞賜甚厚出穀疏令翰林學士承旨陶穀為贊以賜之是夏世宗還穀扶疾見便殿詔令不拜命坐御坐側以抱疾既久請辭相位世宗怡然勉之謂曰譬如家有四子一人有疾棄而不養非父之道也朕君臨萬方卿處輔相之位君臣之間分義斯在奈何以祿奉為言穀愧謝而退俄以平壽州敘功加爵邑是秋穀抗表乞骸骨罷相守司空加邑封令每月肩輿一詣便殿訪以政事五年夏世宗平淮南回賜穀錢

百萬米麥五百斛芻粟薪炭等恭帝即位加開府儀同  
三司進封趙國公求歸洛邑賜錢三十萬從其請太祖  
即位遣使就賜器幣建隆元年卒年五十八太祖聞之  
震悼贈侍中穀為人厚重剛毅深沉有城府雅善談論  
議政事能近取譬言多詣理辭氣明暢人主為之聳聽  
人有難必救有恩必報好汲引寒士多至顯位與韓熙  
載善熙載將南渡密告穀曰若江東相我我當長驅以  
定中原穀笑曰若中原相我下江南探囊中物耳穀後

果如其言李昉嘗為穀記室在淮上被病求先歸穀視之曰子他日官祿當如我昉後至宰相司空周顯德中扈載以文章馳名樞密使王朴薦令知制誥除書未下朴詣中書言之穀曰斯人命薄慮不克享耳朴曰公在衡石之地當以材進人何得言命而遺才載遂知制誥遷翰林學士未幾卒世謂朴能薦士穀能知人穀歸洛中昭義李筠以穀周朝名相遺錢五十萬他物稱是穀受之既而筠叛穀憂恚而終子吉至補闕拱至太子中

允

咎居潤博州高唐人善書計後唐長興中隸樞密院為  
小吏以謹愿稱晉初出掌滑州廩庾遂補牙職會景延  
廣留守西洛署為右職延廣卒居潤往依陝帥白文珂  
文珂致仕乃表薦居潤於周祖時世宗尹京詔以補府  
中要職即位擢為軍器庫使從征高平以功遷客省使  
知青州從向拱西征為行營都監秦鳳平以居潤為秦  
州歷知鳳陽河中府顯德三年秩遷內客省使代王朴

知開封府四年再幸壽州命為副留守十月幸淮上以  
居潤為宣徽北院使兼副留守五年夏南征還復判開  
封府六年征關南為東京副留守及吳延祚出塞河命  
居潤權知開封府事延祚為樞密使真判開封府改左  
領軍衛上將軍恭帝嗣位加檢校太傅太祖立加檢校  
太尉及征澤潞命赴澶州巡警師還權知鎮州加左領  
軍衛上將軍建隆二年又權知澶州八月拜義武軍節  
度在鎮數年得風痺詔還京師乾德四年卒年五十九



贈太師居潤性明敏有節槩篤於行義初晉室將亡景  
延廣委其族自洛赴難至則為遼人所執遼人在洛者  
遽欲恣標掠延廣僚吏部曲悉遁獨居潤力保護其家  
以安居潤與太祖同事世宗情好款浹嘗薦沈倫於太  
祖以為純謹可用後至宰相世稱其知人子惟質至內  
園使弟居濟至水部員外郎大中祥符三年錄其孫建  
中為三班借職

竇貞固字體仁同州白水人父專後唐左諫議大夫貞

固初能屬文同光中舉進士補萬全主簿丁內艱去官服除授河東節度推官時晉祖在藩以貞固廉介甚重之及即位擢為戶部員外郎翰林學士就拜中書舍人天福三年詔百僚各上封事貞固疏曰臣聞舉善為明知人則哲聖君在位敷澤豈有隱淪昭代用材政理固無紊亂求賢若渴從諫如流鄭所以譽子皮魯所以譏文仲為國之要進賢是先陛下方樹丕基宜求多士乞降詔百僚令各司議定一人有何能識堪何職官朝廷

依奏用之若能符薦引果謂當才所奏之官望加獎賞如乖其舉或涉徇私所奏之官宜加黜罰自然官由德序位以才升三人同行尚聞擇善十目所視必不濫知臣職在論思敢陳狂狷書奏帝深嘉之命所司著為令典明年改御史中丞與太常卿崔稅刑部侍郎呂琦禮部侍郎張允同詳定正冬朝會禮節樂章及二舞行列歷刑部門下二侍郎少帝即位拜工部尚書遷禮部尚書知貢舉舊制進士夜試繼以三燭長興二年改令晝

試貞固以晝晷短難盡士材奏復夜試擇士平允時論稱之改刑部尚書出為潁州團練使歲餘復拜刑部尚書漢祖入汴貞固與禮部尚書王松率百官見于滎陽西漢祖駐馬勞問久之初營宗廟帝以姓自漢出遂襲國號尊光武為始祖并親廟為五詔羣臣議貞固上言曰按王制天子七廟諸侯五大夫三士一正義曰周之制七廟者太祖及文王武王之祧與親廟四也又曰七廟者據周也有其人則七無其人則五至光武中興及

魏晉宋齊隋唐或立六廟或立四廟蓋建國之始未盈其數也禮曰德厚者流光此天子可以祀六世之義也今陛下大定寰區重興漢祚旁求典禮用正宗祧伏請立高曾祖禰四親廟及自古聖王祖有功宗有德更立始祖在四廟之外不拘定數所以或五廟或七廟今請尊高皇帝光武皇帝為始祖法文王武王不遷之制用歷代六廟之規庶合典禮漢祖從之論者以天子建國各從其所起堯自唐侯禹生大夏是也立廟皆祖其有

功商之契周之后稷魏之武帝晉之三廟是也高祖起於晉陽而追嗣兩漢徒以同姓為遠祖甚非其義貞固又以四親匹庶上合高光失之彌遠矣但援立親廟可也餘皆非禮俄遷吏部尚書初帝與貞固同事晉祖甚相得時蘇逢吉蘇禹珪自霸府僚佐驟居相位思得舊臣冠首以貞固持重寡言有時望乃拜司空門下侍郎平章事弘文館大學士貞固少時中蠱若贅在喉中常鯁閤及為相日因大吐有物狀蜥蜴落銀盤中毒氣衝

盤焚於中衢臭聞百步外人皆異之隱帝即位加司徒  
改本貫永安鄉為賢相鄉班瑞里為勲貴里楊邠史弘  
肇王章樹黨恣橫專權凌上貞固但端莊自持不能規  
救周祖兵起貞固與蘇逢吉奉隱帝兵次于野敗逢吉  
倉黃自殺貞固遂詣周祖周祖稱太后制委貞固與蘇  
禹珪王峻同掌軍國政事周祖登位加兼侍中會以馮  
道為首相改監修國史俄罷相守司徒封沂國公世宗  
即位以范質為司徒貞固遂歸洛陽輸課役齒為編民

貞固不能堪愬於留守向拱拱不聽宋初以前三公赴  
闕陪位詣范質求任東宮三少預朝請質不為奏乃還  
洛放曠山水與布衣輩携妓載酒以自適開寶二年病  
困自為墓誌卒年七十八

李濤字信臣京兆萬年人唐敬宗子郇王瑋十世孫祖  
鎮臨濮令父元將作監朱梁革命元以宗室懼禍挈濤  
避地湖南依馬殷署濤衡陽令濤從父兄郁仕梁為閤  
門使上言濤父子旅湖湘詔殷遣歸京師補河陽令後



唐天成初舉進士甲科自晉州從事拜監察御史遷右  
補闕宋王從厚鎮鄴以濤為魏博觀察判官歲餘入為  
起居舍人晉天福初改考功員外郎史館修撰晉祖幸  
大梁張從賞以盟津叛陷洛陽扼虎牢故齊王全義子  
張繼祚者實黨之晉祖將族其家濤上疏曰全義歷事  
累朝頗著功効當巢蔡之亂京師為墟全義手披荊棘  
再造都邑垂五十年洛民賴之乞以全義之故止罪繼  
祚妻子從之嘗奉詔為宋州括田使前雄州刺史袁正

辭齋束帛遺濤以田園為託濤表其事晉祖嘉之正辭  
坐降一階濤遷浚儀令改比部郎中鹽判官改刑部郎  
中涇帥張彥澤殺記室張式奪其妻式家人詣闕上訴  
晉祖以彥澤有軍功釋其罪濤伏閤抗疏請寘於法晉  
祖召見諭之濤植笏叩階聲色俱厲晉祖怒叱之濤執  
笏如初晉祖曰吾與彥澤有誓約恕其死濤厲聲曰彥  
澤私誓陛下不忍食其言范延光嘗賜鐵券今復安在  
晉祖不能荅即拂衣起濤隨之諫不已晉祖不得已召

式父鐸弟守貞子希範等皆拜以官罷彥澤節制濤歸洛下賦詩自悼有三諫不從歸去來之句先是范延光據鄴叛晉祖賜鐵券許以不死終亦不免故濤引之晉祖崩濤坐不赴臨停未幾起為洛陽令遷屯田職方郎中中書舍人會契丹入汴彥澤領突騎入京城恣行殺害人皆為濤危之濤詣其帳通刺謁見彥澤曰舍人懼乎濤曰今日之懼亦猶足下昔年之懼也向使先皇聽僕言寧有今日之事彥澤大笑命酒對酌濤神氣自若

漢祖起義至洛濤自汴奉百官表入對漢祖問京師財賦從契丹去後所存幾何濤具對稱旨漢祖嘉之至汴以為翰林學士杜重威據鄴叛高祖命高行周慕容彥超討之二師不協濤密疏請親征高祖覽奏以濤堪任宰輔即拜中書侍郎兼戶部尚書平章事隱帝即位楊邠周祖共掌機密史弘肇握兵柄與武德使李鄴等中外爭權互作威福濤疏請出邠等藩鎮以清朝政隱帝不能決白于太后太后召邠等諭之反為所構免相歸

第時中書厨釜鳴者數四濤晝寢閣中夢嚴飾廳事羣吏趨走云迎新宰相帶諸司使既寤心異之數日濤罷以邠為相兼樞密使及周祖舉兵太后倉皇涕泣曰不用李濤之言宜其亡也周初起為太子賓客歷刑部戶部二尚書世宗宴駕為山陵副使恭帝即位封莒國公宋初拜兵部尚書建隆二年濤被病有軍校尹勲董浚五丈河陳留丁壯夜潰勲擅斬隊長陳琲等十人丁夫七十人皆杖一百刖其左耳濤聞之力疾草奏請斬勲

以謝百姓家人謂濤曰公久病宜自愛養朝廷事且置之濤憤言曰人孰無死但我為兵部尚書坐視軍校無辜殺人烏得不奏太祖覽奏嘉之詔削奪勲官爵配隸許州濤卒年六十四贈右僕射濤慷慨有大志以經綸為已任工為詩筆札道媚性滑稽善諧謔亦未嘗忤物居家以孝友聞景德三年其孫惟勤詣闕自陳詔授許州司士叅軍子承休至尚書水部郎中承休子仲容濤弟澣字日新幼聰敏慕王楊盧駱為文章後唐長興

初吳越王錢鏐卒詔兵部侍郎楊凝式撰神道碑令澣  
代草凡萬餘言文彩適麗時輩稱之秦王從榮召至幕  
中從榮敗勒歸田里久之起為校書郎集賢校理晉天  
福中拜右拾遺俄召為翰林學士會廢學士院出為吏  
部員外郎遷禮部郎中知制詔復置翰林遷中書舍人  
再為學士時濤在西掖縉紳榮之契丹入汴澣與同職  
徐台符俱陷塞北永康王烏雲襲位置澣宣政學士殿  
舒嚕死舒嚕立以其妻族蕭海貞為幽州節度使海貞

與澣相善澣乘間諷海貞以南歸之計海貞納之周廣  
順二年澣因定州孫方諫密表言契丹衰微之勢周祖  
嘉焉遣諜者田重霸賁詔慰撫仍命澣通信澣復表述  
契丹主幼弱多寵好擊鞠大臣離貳若出師討伐因與  
通好乃其時也請速行之屬中原多事不能用其言澣  
在契丹嘗逃歸為其所獲防禦彌謹契丹應歷十二年  
六月卒時建隆三年也濤收澣文章編之為丁年集澣  
二子承確主客郎中承續職方郎中



仲容字儀父舉進士甲科除大理評事知三原縣累擢

監察御史為殿試進士考官真宗問題義對稱旨詔試

中書擢左司諫直史館天聖中以起居郎為知制誥累

遷右諫議大夫在西掖八年次當補學士而不為宰相

張士遜所喜罷為給事中集賢院學士判史館司農寺

復知制誥及石中立張觀補學士始以為翰林侍讀學

士久之兼龍圖閣學士至戶部侍郎卒仲容性醇易喜

飲酒不與物忤與人言未嘗及勢利三弟早卒字具諸

孤十餘人如已子當世稱其長者然於吏事非所長自  
集制草為冠鳳集十二卷

王易簡字國寶京兆萬年人性介特寡合曾祖肱唐劍  
州刺史祖遠連州刺史父貫唐州刺史易簡少好學工  
詩會僖宗幸蜀長安兵亂避地山谷梁乾化中邵王友  
誨鎮陝易簡舉進士詣府拔解友誨贈錢二十萬明年  
遂擢第復隱華山邠帥韓恭辟觀察支使府罷華帥李  
保衡復辟從事踰年尹皓代保衡易簡仍在幕府會朱

友謙以河中叛歸莊宗攻華州甚急城中危懼咸請築  
月城以自固皓恃勇不聽下令曰有敢復言者斬易簡  
固請迺許板築始畢外城果壞軍民賴之會夜不能攻  
友謙遂遁去皓卒易簡歸田里久之召為著作郎數月  
棄去復召為右拾遺上書忤旨出為鄧州節度推官後  
唐同光中遣魏王繼岌伐蜀以宰相郭崇韜為招討使  
辟易簡為巡官改魏王都督府記室叅軍明宗即位周  
帥羅周恭辟為掌書記府罷退居華陰作小隱詩二十

首并序以見志好事者多傳誦秦王從榮聞而重之謂

宰相馮道李愚曰易簡有才豈宜久居外地即召為祠

部員外郎改水部郎中知制誥府中書舍人晉初賜金

紫判弘文館史館事晉祖為治務求速效易簡上漸治

論以諫之詔書褒荅以論付史館及廢翰林學士易簡

兼知內制又拜御史中丞歷右丞吏部侍郎左丞判吏

部銓嘗上言選門格敕條件具存藩府官僚習熟者少

凡給文解未曉規程以致選人詣都親求解樣往來跋

涉重可傷閔傳寫少差旋復驗放乞自今委南曹詳定  
解樣兼錄長定格取解條下諸州板置州院門每取解  
時準條式遵行從之晉祖在大梁臺省湫隘易簡奏舉  
故事一歲得元省錢二百萬繕治省署及造器物號為  
舉職周朝諱易簡止名易廣順初遷禮部尚書是冬合  
三銓為一令易簡權判俄改刑部尚書周祖將親郊命  
判兵部會冊四廟命為副使周祖晏駕為山陵副使顯  
德四年告老以太子少保致仕歸鄉里宋初召加少傳

所居華陰構一鳴堂二品樓優遊自適建隆四年四月  
無疾卒年七十九子景讓進士及第至尚書郎

趙上交涿州范陽人本名遠字上交避漢祖諱遂以字  
稱祖光鄴鄂州錄事叅軍父簡章涿州司馬上交身長  
七尺黑色美風儀善談論負才任氣為鄉里所推後唐  
同光中嘗詣中山王都有和少微者亦在都門下忌  
之頗毀訾上交都遂不為禮上交不得志因南游洛陽  
與中官驃騎大將軍馬紹宏善紹宏領北面轉運制置

大使表為判官遷殿中丞秦王從榮開府兼判軍衛以上交為虞部員外郎充六軍諸衛推官李潛張沆魚崇遠皆白衣在秦府悉與上交友善累遷司封郎中充判官從榮素豪邁不遵禮法好昵羣小上交從容言曰王位尊嚴當修令德以慰民望王恐為此獨不見恭世子戾太子之事乎從榮怒出之歷涇秦二鎮州節度判官從榮及禍僚屬皆坐斥上交由是知名晉初召為左司郎中度支判官歷右諫議大夫會廢翰林學士以上交

為中書舍人知內外制遷刑部侍郎嘗上言伏覩長興  
中詔書州縣官在任詳讞刑獄昭雪人命者不限歲月  
赴選許令超資注官仍賜章服諸道州府給付公驗躬  
赴行部投狀隨給優牒庶絕欺罔以存激勸載詳元詔  
止言州縣未該內外職司乞自今但能雪活冤獄不限  
中外官並加旌賞諸道州縣委長吏抄案以聞俟本人  
考滿即詣刑部投狀毋得隔越年歲庶使內外同律詔  
從之俄遷戶部侍郎拜御史中丞彈舉無所阿避契丹



入汴立明宗幼子許王從益為帝以禮部尚書王崧為左丞相上交為右丞相契丹去上交請去偽號稱梁王漢祖將至從益遣上交馳表獻款授檢校禮部尚書太僕卿遷祕書監周祖監國命太師馮道迎湘陰公于徐州以上交割之廣順初拜禮部侍郎會將試貢士上交申明條制頗為精密始復糊名考校擢扈載甲科及取梁周翰董淳之流時稱得士轉戶部侍郎明年再知舉謗議紛然時樞密使王峻用事常薦童子上上交拒之峻

怒奏上交選士失實貶商州司馬朝議以為太重會峻

貶乃止但坐所取士李觀侯璘賦落韻改太子詹事顯

德初遷賓客二年拜吏部侍郎多請告不朝時出游別

墅世宗因問陶穀曰上交豈衰老乎穀對曰上交昔掌

貢舉放鶯市家子李觀及第受所獻名園多植花卉優

游自適世宗怒免其官宋初起為尚書右丞建隆二年

正月卒年六十七上交所蒞官以幹聞當時稱有公輔

器尤好吟詠有集二十卷張昭為序子曦字可畏七歲

喪母過哀十二能屬文與兄駿同舉進士未成名而兄夭遂以蔭補千牛備身歷祕書郎殿中丞著作郎卒年二十六有集十卷太宗嘗取以入內

張錫福州閩縣人梁末劉君鐸任棣州刺史辟為軍事判官棣為鄆之屬郡郡有麴務鄆以牙將主之頗橫恣民有犯麴三斤牙將欲寘于死君鐸力不能救既而牙將盜麥百斛私造麴事覺錫判曰麴犯三斤求生不克麥盜百斛免死誠難時郡吏以使府牙將乞免錫不允

固寘于法同光末趙在禮舉兵於鄴潞河諸州多構亂  
錫權知州事即出省錢賞軍皆大悅一郡獨全隸人賴  
之後為淄州令不畏強禦專務愛民刺史有所徵不荅  
由是銜之及代白其事於宰相馮道道知錫介直即奏  
召為監察御史出為陝虢觀察判官晉開運二年拜右  
補闕歷起居郎刑部員外郎開封府判官浚儀令司門  
駕部二郎中並以清節聞周顯德中以老疾求解官授  
右諫議大夫致政宋初改給事中錫無子宰相范質嘗

兄事之館於別墅錫以執政之門不欲久處徃依鄉人  
鄧州觀察判官黃保緒建隆二年六月卒于穰下

張鑄字司化河南洛陽人性清介不事生產曾祖居卿  
祖謁父文蔚在唐俱舉進士謁至翰林學士承旨天平  
軍節度檢校吏部尚書文蔚中書侍郎平章事五代史  
有傳鑄梁貞明三年舉進士補福昌衛集賢校理拜監  
察御史遷殿侍御史仕後唐歷起居郎金部員外郎賜  
緋改右司員外郎明宗初轉金部郎中賜金紫嘗上言

曰國家以務農為本守令以勸課為先廣闢田疇用實  
倉廩竊見所在鄉村浮戶方事墾闢甫成生計種田未  
至二頃植木未及十年縣司以定色役民畏責斂捨之  
而去殊乖撫恤之方徒設招携之令望令諸州應有荒  
田縱民墾蒔俟及五頃已上三年外始聽差科從之使  
兩浙還遷考功郎中晉天福初福州王延義奉表稱藩  
遣鑄持節冊為閩國王少帝即位改河南令開運二年  
召為太常少卿避曾祖諱不拜改祕書少監判太常寺

事踰年轉右庶子分司西京周廣順初入為左諫議大  
夫給事中使朗州顯德三年授檢校禮部尚書光祿卿  
又以祖名請避改祕書監判光祿寺宋初加檢校刑部  
尚書建隆四年卒年七十二鑄美姿儀善筆札老能燈  
下細書如蠅頭由晉以來天地宗廟及上徽號封拜王  
公冊文皆詔鑄書之及卒身無兼衣家人鬻其服馬園  
圃得錢十萬以葬

邊歸謹字安正幽州薊人父退思檀州刺史歸謹弱冠

以儒學名後唐末客游并邠晉祖鎮太原召置門下表  
為河東節度推官試祕書省校書郎改太原府推官試  
大理評事天福初拜監察御史歷殿中侍御史禮部員  
外郎充戶部判官遷水部郎中賜金紫拜比部郎中知  
制誥歷右諫議大夫給事中嘗上言使臣經過州縣券  
料外妄自徵需以豐儉從多索人驢用遞行李挾命為  
勢凌下作威供億稍遲即加鞭箠吏民受辱寧免怨嗟  
欲望察訪得情嚴示懲戒從之俄遷右散騎常侍漢初



歷禮部刑部二侍郎時史弘肇怙權專殺閭里告訐成風歸譴言曰邇來有匿名書及言風聞事構害善良有傷風化遂使貪吏得以報復私怨讒夫得以肆其虛誕請明行條制禁遏誣罔凡顯有披論具陳姓名其匿名書及風聞事者並望止絕論者躋之周廣順初遷兵部戶部二侍郎世宗聞其亮直擢為尚書右丞樞密直學士以備顧問就轉左丞世宗以累朝以來憲網不振命為御史中丞歸譴雖號廉直而性剛介言多忤物顯德

三年冬大宴廣德殿歸讜酒酣揚袂言曰至於一栢而

已世宗命黃門扶出之歸讜回顧曰陛下何不決殺趙  
守微守微者本村民因獻策擢拾遺有妻復娶又言涉  
指斥坐決杖配流故歸讜語及之翌日伏閣請罪詔釋  
之仍於閤門復飲數爵以愧其心五年秋歸讜與百官  
班廣德殿門外忽厲聲聞於帝詔奪一季奉宋初遷刑  
部尚書建隆三年告老拜戶部尚書致仕乾德二年卒  
年五十七子定雍熙二年進士及第

劉溫叟字永齡河南洛陽人性重厚方正動遵禮法唐武德功臣政會之後叔祖崇望相昭宗父岳後唐太常卿溫叟七歲能屬文善楷隸岳時退居洛中語家人曰吾兒風骨秀異所未知者壽耳今世難未息得與老夫皆為溫洛之叟足矣故名之溫叟以蔭補國子四門助教河南府文學清泰中為左拾遺內供奉以母老乞歸就養改監察御史分司時臺署廢弛溫叟作新之未幾召為右補闕晉初王松權知青州表為判官加朝散階

入為主客員外郎少帝領開封尹奏為巡官命典文翰  
又改廣晉府巡官少帝即位拜刑部郎中賜金紫改都  
官郎中充翰林學士初岳仕後唐嘗居內署至是溫叟  
復居斯任時人榮之溫叟既受命歸為母壽候立堂下  
須臾聞樂聲兩青衣舉箱出庭奉紫袍兼衣母命捲簾  
見溫叟曰此即爾父在禁中日內庫所賜者溫叟拜受  
泣下退開影堂列祭以文告之母感愴累日不忍見溫  
叟歲滿加知制誥契丹入汴溫叟懼隨契丹北遷與承

旨張允共上表求解職契丹主怒欲出允等為縣令趙延壽曰若學士才不稱職求解者守本官可也不可加貶出遂得罷職出院漢祖南下溫叟自洛從至鄭州稱疾不行及入汴溫叟久之方至授駕部郎中周初拜左諫議大夫逾年改中書舍人加史館修撰判館事顯德初遷禮部侍郎知貢舉得進士十六人有譖于帝者帝怒黜十二人左遷太子詹事溫叟實無私後數年其被黜者相繼登第溫叟與張昭同修漢隱帝及周祖實錄

恭帝即位遷工部侍郎兼判國子祭酒事宋初改刑部  
建隆九年拜御史中丞丁內艱退居西洛旋復本官十  
年兼判吏部銓因上言曰伏見兩京百司漸乏舊人多  
隳故事雖檢閱具存於往冊而舉行須在於攸司蓋因  
年限得官歸司者例與減選冬集赴調授任者尋又出  
京兼有裁滿初官不還舊局但稱前資用圖免役又有  
嘗因停任切欲歸司而元敕不該無由復職遂使在司  
者失於教習歷事者難於追還伏望自今諸司職掌除

官勒留及歸司者如理減外欠三選以下仍須在司執行公事及三十月即許赴集如理選外欠三選以上及在官不成資考者即准元敕處分若在任停官及在司停職者經恩後於刑部出給雪牒却勒歸司如無闕員即令守闕餘依敕格處分一日晚歸由闕前太祖方與中黃門數人偶登明德門西闕前騶者潛知之以白溫叟溫叟令傳呼如常過闕翌日請對具言人主非時登樓則近制咸望恩宥輦下諸軍亦希賞給臣所以呵導

而過者欲示衆以陛下非時不登樓也太祖善之憲府  
舊例月賞公用茶中丞受錢一萬公用不足則以贓罰  
物充溫叟惡其名不取任臺丞十二年屢求代太祖難  
其人不允開寶四年被疾太祖知其貧就賜器幣數月  
卒年六十三溫叟事繼母以孝聞雖盛暑非冠帶不敢  
見五代以來言執禮者惟溫叟焉立朝有德望精賞鑒  
門生中尤器楊徽之趙隣幾後皆為名士范杲幼時嘗  
以文贄溫叟大加稱獎以女妻之太祖在晉邸聞其清



介遣吏遺錢五百千溫叟受之貯廳西舍中令府吏封署而去明年重午又送角黍紈扇所遣吏即遺錢者視西舍封識宛然還以白太宗太宗曰我錢尚不用況他人乎昔日納之是不欲拒我也今周歲不啓封其苦節愈見命吏輦歸邸是秋太宗侍宴後苑因論當世名節士具道溫叟前事太祖再三賞歎雍熙初子炤罷徐州觀察推官待選以貧詣登聞求注官及引對太宗問誰氏子炤以溫叟對太宗愀然召宰相語其事且言當今

大臣罕有其比因問炤當得何官宰相言免選以為厚恩帝曰其父有清操錄其子登朝庶足示勸擢炤太子右贊善大夫歷判三司理欠憑由司江南轉運司入朝為司封郎中炳煜並進士及第

煜字輝卿進士及第積官祕書省著作郎知龍門縣羣盜殺人煜捕得之將械送府恐道亡去皆斬之衆服其果通判益州召還時王曙治蜀或言其政苛暴真宗問曙治狀與凌策孰愈煜曰策在蜀歲豐事簡故得以寬

假民比歲小歛盜賊竊發非誅殺不能禁然曙所行亦未嘗出陛下法外帝善之天禧元年始置諫官帝謂宰相曰諫官御史當識朝廷大體於是以煜為右正言會歲荐饑河決滑州大興力役饑殍相望煜請策免宰相以應天變都城東南有泉出民爭傳可以已疾詔即其地建祥源觀煜言其詭妄不經且亢旱不可興土木以營不急又請罷提點刑獄禁民棄父母事佛老者皆不報表請補外帝以煜屢言事乃以判三司戶部勾院出

安撫京西還直集賢院同修起居注遷右司諫以尚書  
工部員外郎兼侍御史知雜事權判吏部流內銓請京  
朝官遭父母憂官司毋得奏留故事當起復者如舊因  
詔益梓利夔路長吏仍舊奏裁餘乞免持服者論其罪  
改三司戶部副使擢龍圖閣待制提舉諸司庫務權發  
遣開封府事累遷刑部郎中龍圖閣直學士知河南府  
徙河中府卒初王曙坐寇準貶官在朝無敢往見者煜  
歎曰友朋之義獨不行於今歟往餞之經宿而還嘗善

河中處士李瀆瀆死為陳其高行詔以著作郎贈之唐末五代亂衣冠舊族多離去鄉里或爵命中絕而世系無所考惟劉氏自十二代祖北齊中書侍郎環雋以下仕者相繼而世牒具存焉子凡

凡字伯壽以煜任為將作監主簿生而豪雋長折節讀書第進士從范仲淹辟通判邠州邠地鹵民病遠汲凡浚渠引水注城中役興客曰自郭汾陽城此州苟外水可醜何待今日無為虛費勞人也凡不荅未幾水果至

鑿五池于通達民大便利孫沔薦其才堪將帥換如京  
使知寧州俗喜巫軍校仗妖法結其徒亂有日几使他  
兵伏壘門以伺夜半盡擒之加本路兵馬鈐轄知邠州  
儂智高犯嶺南几上書願自効以為廣東西捉殺道聞  
蔣偕張忠戰沒疾馳至長沙見狄青曰賊若退守巢穴  
瘴毒方興當班師以俟再舉若恃勝求戰此成擒耳賊  
果悉衆來大戰于歸仁鋪前鋒孫節死几以右軍搏鬪  
自辰至巳勝負未決几言於青出勁騎五千張左右翼

擣其中堅賊駭潰進皇城使知涇州陞見辭以母老丐  
復文階歸養仁宗諭之曰涇內地也將母莫便焉命特  
賜冠帔領循州刺史遷西上閤門使再歸郎中班曾公  
亮薦之復以嘉州團練使為太原涇原路總管夏人寇  
用亮堡轉運使陳述古攝渭帥凡移文索援兵不聽率  
諸將偕請又不聽乃趣以手書述古怒移凡為鳳翔且  
劾生事朝廷以總管非轉運使所得徙置遣御史出按  
述古黜凡亦改鄜州召判三班院邊吏告夏人趨大順

英宗問凡几曰大順天險非夏人可得近正恐與趙明  
為讎爾帝曰明之子奔馬入城幾為所掩卿料敵一何  
神也以為秦鳳總管神宗即位轉四方館使知保州治  
狀為河北第一踰六年即請老還為祕書監致仕元豐  
三年祀明堂大臣言凡知音詔詣太常定雅樂凡曰古  
樂備四清聲沿五季亂離廢請增之樂成予一子官凡  
得謝二十年放曠嵩少間遇唐末異人靖長官者得養  
生訣故益老不衰間與人語邊事謂張耒曰比見詔書



禁邊吏夜飲此曹一旦有急將使輸其肝腦此平日禁其為樂為今役者不亦難乎夫椎牛醢酒豐犒而休養之非欲以醉飽為德所以增士氣也未敬識其語再加通議大夫卒年八十一凡篤於風義推父遺恩官從兄已得任子必先兄弟子之孤者其議樂律最善以為律主於人聲不以尺度求合古今異時聲亦隨變猶以古冠服加於今人安得而稱儒者泥古致詳於形名度數間而不知清濁輕重之用故求於器雖合而考於聲則

不諧嘗游佛寺聞鐘聲曰聲漸而悲主者且不利是夕主僧死在保州聞角聲曰宮微而商離至秋守臣憂之及期几遇疾然所學頗雜鄭衛云

劉濤字德潤徐州彭城人後唐天成中舉進士釋褐為鳳翔掌書記拜右拾遺賜緋時太常丞史在德上章詞理鄙俗仍犯廟諱濤上言請正其罪雖不允時論是之出為山南東道節度判官召為左補闕遷起居舍人晉天福初改司勳員外郎史館修撰遷工部郎中賜金紫

歷度支職方二郎中掌左藏庫時少帝奢侈常以銀易金廣其器皿李崧判三司令上庫金之數及崧以元簿較之少數千鎰崧責曰帑庫通式一日不受虛數毫釐則有重典濤曰帑司常有報不盡數以備宣索崧令有司劾濤濤事迫以情告樞密使桑維翰乃止罰一月奉漢初宰相蘇禹珪薦為中書舍人周廣順中坐令子監察御史項代草誥命左遷少府少監分司西京項亦貶復州司戶顯德初就改太常少卿俄拜右諫議大夫四

年再知貢舉樞密使王朴嘗薦童子劉譜於濤濤不納  
朴銜之時世宗南征在迎鑾濤引新及第人赴行在朴  
時留守上都飛章言濤取士不精世宗命翰林學士李  
昉覆試黜者七人濤坐責授太子右贊善大夫恭帝即  
位遷右詹事濤性剛毅不撓素與宰相范質不協常鬱  
鬱不得志遂退居洛陽之清化里杜門以書史自娛太  
祖素知濤履行開寶二年召赴闕以老病求退授祕書  
監致仕年七十二卒清泰初中書舍人盧導受詔主文

將鎖宿濤力薦薛居正以為文章器業必至台輔導取  
之後果為相世稱其知人頊子歲晟子訥譚並進士及  
第至屯田員外郎訥為殿中侍御史

遑光範字子儀并州陽曲人性謙退和雅有吏材父仁  
嗣忠武軍節度副使光範後唐天成二年起家榆次令  
召為殿中丞賜緋長興四年改太常丞丁內艱晉天福  
初服闋授檢校戶部員外郎北京留守判官兼侍御史  
二年拜太府少卿上書曰臣聞唐太宗有言朕居深宮

之中視聽不能及遠所委者惟都督刺史則知此官實  
繫治亂必須得人今則刺史或因緣世祿或貢奉家財  
或微立軍功或但循官序實恐撫民無術御史無方以  
此牧民而民受其賜鮮矣望選能吏以蘇民瘼用致升  
平奏入留中不出俄為冊秦王李從曠副使張從恩以  
外戚為河南尹奏授判官遷祕書監兼御史中丞入拜  
大理少卿少帝尹京改衛尉少卿充開封府判官又改  
光祿少卿廣晉府判官賜金紫少帝即位拜右諫議大

夫權知開封府事遷給事中會蝗災遣使亳州括借軍糧稱為平允時與契丹失歡河朔連兵命光範出使修好會契丹復南入光範行至趙州召還開運元年權知鄭州拜左散騎常侍二年入為樞密直學士少帝以光範藩邸舊僚待遇尤厚因游宴見光範位翰林學士下即日拜尚書禮部侍郎知制誥充翰林學士仍直樞密院漢初改檢校刑部尚書衛尉卿上言伏見朝廷除刺史不限年月或未及期年又間除代往來跋涉豈暇撫

懷望慎選良牧立定年限以責輯綏之効疏入不報乾  
祐二年連使宋州虞城汝州襄城按視民田之傷稼者  
是冬為吳越加恩使周廣順初出知陳州遷祕書監俄  
召拜御史中丞賜襲衣銀器繒綵鞍勒馬復為禮部侍  
郎時禮部侍郎於貢部或掌或否光範拜官將及秋試  
乃言於執政曰單門偶進何言名第若他曹公事光範  
不敢辭若處文衡校閱名賢品藻優劣非下走所能執  
政曰公晉末為翰林樞密直學士勿避事也及期光範



辭疾不出乃以翰林學士承旨徐台符掌之時論多其

自知世宗即位改刑部侍郎權知開封府俄遷戶部顯

德三年命往大名檢民田五年遣使普均租稅光範詣

宋州時韓通掌禁兵領宋師修汴堤訪郡民皆言光範

均平之狀乃具以聞世宗嘉之宋初征澤潞命光範為

前軍轉運計度鄭洛汝孟懷芻糧秋拜太常卿時張昭

為吏部尚書朝議以其耆老令光範簽判選事建隆四

年襄州節度慕容延釗征湖南以光範權知州事路當

衝會餉饋無闕是冬郊祀召還會延釗卒復知襄州大軍數萬由陝路討蜀出漢上光範復當供億人不知勞嘗舉本鎮判官李楫為殿中侍御史楫後坐事除籍光範左遷太子賓客仍知襄州五年魚橋道使朝廷遣使督治道常六七輩一使所調發民皆數百人吏緣為姦多私取民課所發不充數而道益不修光範計其工以州卒代民官給器用役不淹久人以無擾詔書褒美開寶四年復判吏部銓曹御史中丞劉溫叟卒以光範判

御史臺事數月真拜中丞六年以疾解銓曹任卒年七十三光範性至孝謙退和易雅有吏幹母病疽光範嘗吮之景德中錄其孫易從同學究出身

劉載字德輿涿州范陽人唐盧龍節度濟之六世孫父昭下蔡令載後唐清泰中舉進士晉初解褐校書郎遷著作佐郎賜緋拜左拾遺集賢殿直學士漢初為殿中侍御史丁內艱服闋復拜舊官判西京留臺改倉部員外郎嘗著五論曰為君為相為將去讒納諫頗為文士

所稱周世宗初擢知制誥顯德三年拜右諫議大夫與  
右拾遺鄭起尚書博士李寧同校道書遷給事中使許  
州定田租俄賜金紫為魏王符彥卿加恩國信使宋初  
浚五丈河自陳橋達曹州之西境命護其役建隆四年  
貝州節度使張光翰來朝遣載權知州事先翰歸鎮載  
還知貢舉乾德初掌建安權貨務六年就為江南國主  
生辰使召還令知鎮州開寶四年坐與何繼筠不協改  
山南東道行軍司馬十年不召嘗受詔權點檢州事太

平興國初復入為給事中三年出知襄州六年代還告  
老改工部侍郎致仕乃賜一子出身八年卒年七十一  
載尤好學博通史傳善屬文嘗受詔撰明憲皇后謚冊  
文又作弔戰國賦萬餘言行於世雅信釋典敦尚名節  
子宗言至比部郎中宗望景德二年進士及第大中祥  
符四年其孫介以載文集來獻以為試將作主簿

程羽字冲遠深州陸澤人少好學能屬文晉天福中擢  
進士第授陽穀主簿歷虞鄉醴泉新都令皆有政績開

實中選為兩使判官入對太祖詢以時事數奏稱旨擢  
著作郎出知興州踰年改知興元府

闕

八年詔

歸闕以本官領開封府判官羽性淳厚蒞事恪謹時太  
宗尹京頗以長者待之及即位拜給事中知開封府未  
幾出知成都府為政寬簡蜀人便之入朝拜禮部侍郎  
上欲優以清職故事端明殿設學士二員居翰林學士  
上專備顧問馮道趙鳳始居是職累朝因之及是即殿  
名以羽為文明殿學士位在樞密副使下且即泰寧坊

營第以賜之太平興國五年典試貢士御試得人居多  
六年以老疾求解職拜兵部侍郎未幾致仕仍給全奉  
雍熙元年卒年七十二贈禮部尚書子帝振以蔭至尚  
書虞部員外郎大中祥符元年卒其子適賜同學究出  
身從孫琳別傳

論曰五季為國不四三傳輒易姓其臣子視事君猶傭  
者焉主易則他役習以為常故唐方滅即北面于晉漢  
甫稱禪已相率下拜于周矣君子傷之此雜臣傳所繇

立也李穀邊歸謹實貞固李濤輩或在廟堂或侍帷幄  
世主之所寵任社稷之所倚賴而更事異姓不能以名  
節生死倫義廢矣且穀以籌策自名乃不能料藝祖有  
容人之量及受李筠餽遺懼其見殺遂以憂死又何繆  
邪嗚呼魏范繁齊顏見遠宜見褒於前史也



宋史卷二百六十二


謹案第二十七頁前二行建隆九年按建隆無九年係訛

第二十九頁後二行始置諫官刊本諫訛鑒據下文改

第三十七頁前四行五年兼橋道使按太祖本紀建隆四年十一月改元乾德此云五年有訛

第三十七頁後四行唐盧龍節度濟之六世孫刊本孫訛宗今改





總校官庶吉士

臣

張能照

校對官庶吉士

臣

陳宗本

謄錄監生

臣

王

詔

欽定四庫全書薈要

史部

宋史卷二百六十三

四

詳校官編修臣王天祿



欽定四庫全書薈要卷五千八百九十一

史部

宋史卷二百六十三

元中書右丞相總裁托克托等修

列傳第二十二

張昭

竇儀

弟儼偶

呂餘慶

劉熙古

子蒙正  
蒙叟

石熙載

子中立

李穆

弟肅

張昭字潛夫本名昭遠避漢祖諱止稱昭自言漢常山王耳之後世居濮州范縣祖楚平壽張令楚平生直即

昭父也初楚平赴調長安值巢寇亂不知所終直幼避地河朔既冠以父失所在時盜賊蠭起道路榛梗乃自秦抵蜀徒行丐食求父所在積十年不能得乃發哀行服躬耕海濱青州王師範開學館延置儒士再以書幣招直署賓職師範降梁直脫難北歸以周易春秋教授學者自遠而至時號逍遙先生昭始十歲能誦古樂府詠史詩百餘篇未冠徧讀九經盡通其義處儕類中緩步闊視以為馬鄭不已若也後至贊皇遇程生者專史

學以為專究經旨不通今古率多拘滯繁而寡要若極

談王霸經緯治亂非史不可因出班范漢書十餘義商

榘乃授昭荀紀國志等後又盡得十三史五七年間能

馳騁上下數千百年事又注十代興亡論處亂世躬耕

負米以養親後唐莊宗入魏河朔游士多自効軍門昭

因至魏携文數十軸謁興唐尹張憲憲家富文籍每與

昭燕語講論經史要事恨相見之晚即署府推官同光

初奏授真秩加監察御史裏行憲為北京留守昭亦從



至晉陽莊宗及難聞鄴中兵士推戴明宗憲部將符彥超合戍將應之昭謂憲曰得無奉表勸進為自安之計乎憲曰我本書生見知主上位至保釐乃布衣之極苟覲顏求生何面目見主於地下昭曰此古人之志也公能行之死且不朽矣相泣而去憲遂死之時論重昭能成憲之節時有害昭者昭曰明誠所至期不再生主辱臣亡死而無悔衆執之以送彥超彥超曰推官正人無得害之又逼昭為榜安撫軍民事寧以昭為北京留守

推官加殿中侍御史內供奉官賜緋天成三年改安義  
軍節度掌書記時以武王莊宗實錄未修詔正國節度  
盧質西川節度副使何瓚祕書監韓彥輝續錄事迹瓚  
上言昭有史材嘗私撰同光實錄十二卷又聞其欲撰  
三祖志并藏昭宗朝賜武皇制誥詔九十餘篇請以昭  
所撰送史館拜昭為左補闕史館修撰委之撰錄昭以  
懿祖獻祖太祖並不踐帝位仍補為紀年錄二十卷又  
撰莊宗實錄三十卷上之優詔褒美遷都官員外郎時

皇子競尚奢侈昭疏諫曰帝王之子長於深宮安於逸樂紛華之玩絲竹之音日接於耳目不與驕期而驕自至儻非天資英敏識本清明以此蕩心焉能無惑苟不豫為教道何以置之盤牙臣見先帝時皇子皇弟盡喜無藉玩物之言厭聞致治經邦之論入則務飾姬姜出則廣增僕馬親賓滿坐食客盈門箴規者少諧謔者多以此而欲託以主治不亦難乎臣請諸皇子各置師傅陛下令皇子屈身師事之講論道德使一日之中止記

一事一歲之內所記漸多每月終令師傳具錄奏聞或  
皇子上謁之時陛下更令侍臣面問十中得五為益良多  
博識安危之理深知成敗之由臣又聞古之人君即位  
而封太子拜諸王究其所由蓋有深旨使庶不亂嫡疏  
不間親禮秩有常邪慝不作近代人君失於此道以至  
邦家構患釁隙萌生昔隋祖聰明煬帝亦傾楊勇太宗  
齊聖魏王終覆承乾臣每讀古書深悲其事願於聖  
代杜此厲階其於卜貳封宗在臣未敢輕議臣請諸王

子於恩澤賜與之間婚姻省侍之際依庶嫡而為禮秩  
據親疎而定節文示以等威絕其徼幸保宗之道莫大  
於斯明宗覽疏而不用四年上武王以來功臣列傳三  
十卷以本官知制誥明宗好畋獵昭疏諫曰太祖初鎮  
太原每年打鹿於北鄙先帝在位暇日射鴈於近郊此  
蓋軍務之餘畋遊自適自先帝膺圖啓祚嚮明御宇則  
宜易彼諸侯之事肅乎萬乘之儀而猶因襲舊風失其  
威重驅逐原獸殆無虛日臣愚以為事有可畏者四焉

洛都舊制宮城與秦苑相連人君宴遊不離苑囿御馬來往輦路坦夷不涉荒郊何憂蹶失今則驅馳駢服涉歷榛蕪此後節氣嚴凝徑途凍滑萬一有銜檠之變陛下縱自輕奈宗廟社稷何所可畏者一也又陛下新有四海宜以德服萬邦今則江嶺未平淮夷尚梗彼初聞陛下草先朝之失政還太古之淳風御物以慈節財以儉有典有則不矜不驕彼必有三苗率服之心七旬來格之意如聞陛下暫遊近甸彼即以為復好畋遊所可

畏者二也臣又聞作法於涼其弊猶貪作法於貪弊將如何且打鹿射鴈之事新敗軌傾輶之轍在常宜取鑒不可因循所可畏者三也臣又聞作事可法貽厥孫謀若陛下以齊聖廣淵之機聰明神武之量其可以宴遊蒐狩之事少累聖明所謂城中好廣眉城外加半額為法之弊靡不由茲所可畏者四也伏望陛下居高慮遠慎始圖終思創業之艱難知守成之不易念老氏馳騁之戒樹文王忠厚之基約三驅之舊章定四時之遊幸

始出有節後不敢違疏奏明宗嘉納之長興二年丁內  
艱賻絹布五十匹米麥五十石昭性至孝明宗聞其居  
喪哀毀復賜以錢幣服除改職方員外郎知制誥充史  
館修撰上言乞復本朝故事置觀察使察民疾苦御史  
彈事諫官月給諫紙並從之又奏請勸農耕及置常平  
倉等數事明宗方務聽納昭復上疏曰臣聞安不忘危  
治不忘亂者先儒之不訓靡不有初鮮克有終者前經  
之至戒究觀列辟莫不以驕矜怠惰有虧聖德恭惟太



宗貞觀之初元宗開元之際焦勞庶政以致太平及國  
富兵消年高志逸乃忘守約之道或貽執簡之譏陛下  
以慈儉化天下以禮法檢臣隣絀姦邪之黨延正直之  
論務遵純儉以節浮費信賞必罰至公無私其創業垂  
統之基如貞觀開元之始然陛下有始有終無荒無怠  
臣又伏念保邦之道有八審焉願為陛下陳之夫委任  
審於材器聽受審於忠邪出令審於煩苛興師審於德  
力賞罰審於喜怒毀譽審於愛憎議論審於賢愚嬖寵

審於姦佞推是八審以決萬機庶可以臻至治明宗覽之稱善清泰中改駕部郎中知制誥撰皇后冊文遷中書舍人賜金紫二年召判史館兼點閱三館書籍校正添補預修明宗實錄成三十卷以獻三年遷禮部侍郎改御史中丞晉天福初從幸汴州昭請創宮闕名額及振舉朝綱條疏百司解舍二年改戶部侍郎宰相桑維翰薦為翰林學士內署故事以先後入為次不繫官序特詔昭立位次承旨崔棣晉祖常幸內署與昭語及并

魏舊事甚重之錫賚頗厚直以昭故授著作佐郎致仕至是卒歸西洛賻賜加等五年服闋召為戶部侍郎以唐史未成詔與呂琦崔棣等續成之別置史館命昭兼判院事昭又撰唐朝君臣正論二十五卷上之改兵部侍郎八年遷吏部判東銓兼史館修撰判館事開運二年秋唐書成二百卷加金紫階進爵邑三年拜尚書右丞判流內銓權知貢舉漢初復為吏部侍郎時追尊六廟定謚號樂章武曲命昭權判太常卿事月餘即真乾

祐二年加檢校禮部尚書少帝年十九猶有童心昵比  
羣小昭上言請聽政之暇數召儒臣講論經義周廣順  
初拜戶部尚書子秉陽為翟陽主簿抵罪昭自以失教  
奉表引咎左遷太子賓客歲餘復舊官嘗奏請興制舉  
設賢良方正能直言極諫經學優深可為師法詳閑吏  
治達於教化三科職官士流黃衣草澤並許應詔諸州  
依貢舉體式量試策論三道共以三千字以上為准考  
其文理俱優解送尚書吏部其登朝之官亦聽自舉從

之顯德元年遷兵部尚書世宗以昭舊德甚重焉二年表求致仕優詔不允促其入謁嘗詔撰制旨兵法十卷又撰周祖實錄三十卷及梁郢王均帝後唐閔帝廢帝漢隱帝五朝實錄梁二主年紀寢遠事皆遺失遂不克修餘三帝實錄皆藏史閣世宗好拔英俊有自布衣及下位上書言事者多不次進用昭疏諫曰昔唐初劉洎馬周起於徒步太宗擢用為相其後柳璨朱朴方居下僚昭宗亦加大用此四士者受知於明主然太宗用之

而國興昭宗用之而國亡士之難知如此臣願陛下存  
舊法而用人當以此四士為鑒戒世宗善之詔令詳定  
經典釋文九經文字制科條式及問六經所出并議三  
禮圖祭玉文鼎釜等昭援引經據時稱其該博恭帝即  
位封舒國公宋初拜吏部尚書乾德元年郊祀昭為鹵  
簿使奏復宮闕廟門郊壇夜警晨嚴之制禮畢進封鄭  
國公與翰林承旨陶穀同掌選穀嘗誣奏事引昭為證  
昭免冠抗論太祖不說遂三拜章告老以本官致仕改

封陳國公開寶五年卒年七十九昭博通學術書無不  
覽兼善天文風角太一卜相兵法釋老之說藏書數萬  
卷尤好纂述自唐晉至宋專筆削典章之任嶺南平擒  
劉鋹將獻俘莫能知其禮時昭以致政太祖遣近臣就  
其家問之昭方臥病口占以授使者著嘉善集五十卷  
名臣事迹五卷子秉圖進士及第秉譙至尚書郎

竇儀字可象薊州漁陽人曾祖遜玉田令祖思恭媯州  
司馬父禹鈞與兄禹錫皆以詞學名禹鈞唐天祐末起

家幽州掾歷沂鄧安同鄭華宋澶州支使判官周初為  
戶部郎中賜金紫顯德中遷太常少卿右諫議大夫致  
仕儀十五能屬文晉天福中舉進士侍衛軍帥景延廣  
領夔州節度表為記室延廣後歷滑陝孟鄆四鎮儀並  
為從事開運中楊光遠以青州叛時契丹南侵博州刺  
史周儒以城降光遠與儒遣人引契丹輕騎於馬家渡  
渡河時延廣掌衛兵顏衍知州事即遣儀入奏儀謂執  
政曰昨與衍論事勢有所預慮所以乘驛晝夜不息而



來國家若不以良將重兵控博州渡必恐儒引契丹踰東岸與光遠兵合則河南危矣俄而儒果導契丹渡河增置壘柵少帝軍河上即遣李守貞等率兵萬人水陸並進守汶陽據要害契丹果大至擊走之漢初召為左補闕禮部員外郎周廣順初改倉部員外郎知制誥未幾召為翰林學士周祖幸南御莊宴射坐中賜金紫歷駕部郎中給事中並充職劉溫叟知貢舉所取生有覆落者加儀禮部侍郎權知貢舉儀上言請依晉天福五

年制廢明經童子科進士省卷令納五軸以上不得有神道碑誌之類帖經對義有三通為合格却復盡試其落第者分為五等以詞理紕繆之甚者為第五等殿五舉其次為第四殿三舉以次稍可者為第三第二第一等並許次年赴舉其學究請併周易尚書為一科各對墨義三十道毛詩依舊為一科亦對墨義六十道及第後並減為七選集諸科舉人第一場十否殿五舉第二第三場十否三舉二場內有九否殿一舉解試之官坐

其罪進士請解加試論一首以五百言以上為準奏可  
俄以父病上表解官世宗親加慰撫手封金丹俾賜其  
父父卒歸葬洛陽詔賜錢三十萬米麥三百斛終喪召  
拜端明殿學士從征淮南判行在三司世宗以其餉饋  
不繼將罪之宰相范質救解得免淮南平判河南府兼  
知西京留守事恭帝即位遷兵部侍郎充職俄使南唐  
既至將宣詔會雨雪李景請於廡下拜受儀曰儀獲將  
國命不敢失舊禮儻以霑服失容請俟他日景即拜命

於庭建隆元年秋遷工部尚書罷學士兼判大理寺奉  
詔重定刑統為三十卷會翰林學士王著以酒失貶官  
太祖謂宰相曰深嚴之地當得宿儒處之范質等對曰  
竇儀清介重厚然已自翰林遷端明矣太祖曰非斯人  
不可處禁中卿當諭以朕意勉令就職即日再入翰林  
為學士乾德二年范質等三相並罷越三日始命趙普  
平章事制書既下太祖問翰林學士曰質等已罷普敕  
何官當署承旨陶穀時任尚書乃建議相位不可以久

虛今尚書乃南省六官之長可以署敕儀曰穀所陳非承平之制皇弟開封尹同平章事即宰相之任太祖曰儀言是也即命太宗署敕賜之俄加禮部尚書時御史臺議欲以左右僕射合為表首太常禮院以東宮三師為表首儀援典故以僕射合為表首者六而謂三師無所據朝議是之四年秋知貢舉是冬卒年五十三贈右僕射儀學問優博風度峻整弟儼侃偁僖皆相繼登科馮道與禹鈞有舊嘗贈詩有靈椿一株老丹桂五枝芳

之句縉紳多諷誦之當時號為竇氏五龍初周祖平兗  
州議將盡誅脅從者儀白馮道范質同請於周祖皆得  
全活顯德中太祖克滁州世宗遣儀籍其府庫太祖復  
令親吏取藏中絹給麾下儀曰太尉初下城雖傾藏以  
給軍士誰敢言者今既著籍乃公帑物也非詔不可取  
後太祖屢對大臣稱儀有執守欲相之趙普忌儀剛直  
乃引薛居正參知政事及儀卒太祖閔然謂左右曰天  
何奪我竇儀之速耶蓋惜其未大用也侃漢乾祐初及

第至起居郎僖周廣順初及第至左補闕子諲謁誥俱登進士第諲至都官員外郎謁至祕書丞

儼字望之幼能屬文既冠舉晉天福六年進士辟滑州從事府罷授著作佐郎集賢校理出為天平軍掌書記以母憂去職服除拜左拾遺開運中諸鎮恣用酷刑儼上疏曰案名例律死刑二絞斬之謂也絞者筋骨相連斬者頭頸異處大辟之目不出兩端淫刑之興近聞數等益緣外地不守通規或以長釘貫人手足或以短刀

嚮人肌膚遷延信宿不令就死寃聲上達和氣有傷望  
加禁止上從之儼仕漢為史館修撰周廣順初遷右補  
闕與賈緯王仲同修晉高祖少帝漢祖三朝實錄改主  
客員外郎知制誥時儀自閣下入翰林兄弟同日拜命  
分居兩制時人榮之俄加金部郎中拜中書舍人顯德  
元年加集賢殿學士判院事父憂去職服闋復舊官時  
世宗方切於治道儼上疏曰歷代致理六綱為首一曰  
明禮禮不明則彝倫不敘二曰崇樂樂不崇則二儀不



和三曰熙政政不熙則羣務不整四曰正刑刑不正則巨姦不懾五曰勸農農不勸則資澤不流六曰經武武不經則軍功不盛故禮有紀若人之衣冠樂有章若人之喉舌政有統若人之性情刑有制若人之呼吸農為本若人之飲食武為用若人之手足斯六者不可斯須而去身也陛下思服帝猷寤寐獻納亟下方正之詔廓開藝能之路士有一技必得自効故小臣不揆輒陳禮樂刑政勸農經武之言世宗多見聽納南征還詔儼考

正雅樂俄權知貢舉未幾拜翰林學士判太常寺儼校  
鐘磬筦簫之數辨清濁上下之節復舉律呂旋相為宮  
之法迄今遵用會詔中外臣僚有所聞見並許上章論  
議儼疏曰設官分職授政任功欲為政之有倫在位官  
之無曠今朝廷多士省寺華資無事有員十乃六七止  
於計月待奉計年待遷其中廉幹之人不無愧恥之意  
如非歷試何展公才請改兩畿諸縣令及外府州五千  
戶以上縣令為縣大夫陞為從五品下畿大夫見府尹

如赤令之儀其諸州府縣大夫見本部長如賓從之禮

郎中員外郎起居補闕拾遺侍御史監察御史殿中侍御史光祿少卿以下四品太常丞以下五品等並得衣朱紫滿日准在朝一任約舊官遷二等自拾遺監察除授回日即為起居侍御史中行員外郎若前官不是三署即罷後一年方得求仕如此則士大夫足以陳力賢不肖無以駕肩各繫否臧明行黜陟利民益國斯實良規又以為國家之方守穀帛而已二者不出國而出於

民其道在天其利在地得其理者蕃阜失其理者耗嗇  
民之顓蒙宜有勸教請於齊民要術及四時纂要韋氏  
月錄中采其關於田蠶園圃之事集為一卷鏤板頒行  
使之流布疏奏不報宋初就轉禮部侍郎代儀知貢舉  
當是時祀事樂章宗廟諡號多儼撰定議者服其該博  
車駕征澤潞以疾不從卒年四十二儼性夷曠好賢樂  
善優游策府凡十餘年所撰周正樂成一百二十卷詔  
藏於史閣其通禮未及編纂而卒有文集七十卷儼於

儀尤為才俊對景覽古皆形諷詠更迭倡和至三百篇  
多以道義相敦厲並著集儼顯德中奉使荆南荆南自  
唐季以來高氏據有其地雖名藩臣車服多僭侈踰制  
以至司賓賤隸候館小胥皆盛服影纓與王人亢禮儀  
諷以天子在上諸侯當各守法度悉令去之然後宣達  
君命尤善推步星歷逆知吉凶盧多遜楊徽之同任諫  
官儼嘗謂之曰丁卯歲五星聚奎自此天下太平二十  
遺見之儼不與也又曰儼家昆弟五人皆登進士第可

謂盛矣然無及相輔者惟偁稍近之亦不久居其位卒如其言儼有子早卒以姪說為嗣

偁字日章漢乾祐二年舉進士周廣順初補單州軍事判官遷秘書郎出為絳州防禦判官宋初歷武寧軍掌書記西京留守判官天雄歸德軍節度判官開寶六年拜右補闕知宋州嘗作遂命賦以自悼太宗領開封府尹選偁判官時賈琰為推官偁不樂其為人太宗嘗宴諸王偁琰與會琰言矯誕偁叱之曰巧言令色心獨不

愧乎上愕然因罷會出偁為彰義軍節度判官太平興國五年車駕幸大名府召至行在所拜比部郎中時議北征偁請休兵牧馬以徐圖之上從其言歸以偁為樞密直學士賜第一區六年遷左諫議大夫充職七年參知政事上謂偁曰汝何能臻此偁曰陛下不忘舊臣太宗曰非也卿能以公正責賈琰朕旌直臣爾是秋卒年五十八車駕臨哭贈工部尚書初偁在涇州與丁顥同官顥子謂方幼偁見之曰此兒必遠到以女妻之後為

宰相三公太祖嘗謂宰相曰近朝卿士實儀質重嚴整  
有家法閨門敦睦人無譚語諸弟不能及僖亦中人材  
爾備有操尚可嘉也

呂餘慶幽州安次人本名胤犯太祖偏諱因以字行祖  
充橫海軍節度判官父琦晉兵部侍郎餘慶以蔭補千  
牛備身歷開封府參軍遷戶曹掾晉少帝弟重睿領忠  
武軍節度以餘慶為推官仕漢歷周遷濮州錄事參軍  
太祖領同州節制聞餘慶有材奏為從事世宗問曰得



非嘗為濮州糾曹者乎即以為定國軍掌書記世宗嘗鎮澶淵濮為屬郡故知其為人也太宗歷滑許宋三鎮餘慶並為賓佐及即位自宋毫觀察判官召拜給事中充端明殿學士清泰中琦亦居是職官秩皆同時人榮之未幾知開封府太祖征潞及揚並領上都副留守建隆三年遷戶部侍郎丁母憂荆湖平出知潭州改襄州遷兵部侍郎知江陵府召還以本官參知政事蜀平命知成都府時盜賊四起軍士恃功驕恣大將王全斌等

不能戢下一日藥市始集街吏馳報有軍校被酒持刃奪賈人物餘慶立捕斬之以徇軍中畏伏民用按堵就加吏部侍郎歸朝兼劔南荆南等道都提舉三司水陸發運等使開寶六年與宰相更知政事印旋以疾上表求解機務拜尚書左丞九年卒年五十贈鎮南節度餘慶重厚簡易自太祖繼領藩鎮餘慶為元僚及受禪趙普李處耘皆先進用餘慶恬不為意未幾處耘黜守淄州餘慶自江陵還太祖委曲問處耘事餘慶以理辨釋

上以為實遂命參知政事會趙普忤旨左右爭傾普餘慶獨辨明之太祖意稍解時稱其長者至道中以弟端為宰相特詔贈侍中

劉熙古字義淳宋州寧陵人唐左僕射仁軌十一世孫祖寶進嘗為汝陰令熙古年十五通易詩書十九通春秋子史避祖諱不舉進士後唐長興中以三傳舉時翰林學士和凝掌貢舉熙古獻春秋極論二篇演論三篇凝甚加賞召與進士試擢第遂館於門下清泰中驍將

孫鐸以戰功授金州防禦使表熙古為從事晉天福初  
鐸移汝州又辟以隨熙古善騎射一日有鶚集戟門槐  
樹高八尺鐸惡之投以瓦石不去熙古引弓一發貫鶚  
于樹鐸喜令勿拔矢以旌其能後二歲鐸卒調補下邑  
令俄為三司戶部出使巡官領永興渭橋華州諸倉制  
置發運使仕漢為盧氏令周廣順中改亳州防禦推官  
歷澶州支使秦鳳平以為泰州觀察判官太祖領宋州  
為節度判官即位召為左諫議大夫知青州車駕征維

揚追赴行在建隆二年受詔制置晉州權礬增課八十餘萬緡乾德初遷刑部侍郎知鳳翔府未幾移秦州州境所接多寇患熙古至諭以朝廷恩信取蕃部酋豪子弟為質邊鄙以寧轉兵部侍郎徙知成都府六年就拜端明殿學士丁母憂開寶五年詔以本官參知政事選名馬銀鞍以賜歲餘以足疾求解拜戶部尚書致仕九年卒年七十四贈右僕射熙古兼通陰陽象緯之術作續聿斯歌一卷六壬釋卦序例一卷性淳謹雖顯貴不

改寒素歷官十八登朝三十餘年未嘗有過嘗集古今  
事迹為歷代紀要十五卷頗精小學作切韻拾玉二篇  
摹刻以獻詔付國子監頒行之子蒙正蒙叟

蒙正字頤正善騎射乾德中以蔭補殿直遷供奉官王  
師征江南命乘傳軍中事承事盧絳以舟師來援潤州  
蒙正白部署丁德裕請分精甲百人出與絳戰矢中左  
脅戰愈力及下潤州獲知州劉澄監軍崔亮部送闕下  
嶺南陸運香藥入京詔蒙正往規畫蒙正請自廣韶江

沂流至南雄由大庾嶺步運至南安軍凡三鋪鋪給卒三十人復由水路輸送又掌朝服法物庫會重製繡衣鹵簿多其規式太平興國四年轉內藏庫副使進崇義使自創內藏庫即詔蒙正典領凡二十餘年真宗初改如京使出知滄冀磁三州戎人犯境蒙正調丁男乘城固守有勞未幾以擅乘驛馬責授亳州團練副使咸平四年卒年七十二

蒙叟字道民乾德中進士甲科歷岳宿二州推官以所

知論薦授太子中允知乾興拜監察御史徙知濟州俄以秦王子德恭判州事就命為通判郡事皆決於蒙叟遷右補闕轉起居舍人戶部鹽鐵判官再遷屯田郎中歷知廬濠滁汝四州遷都官咸平中上疏曰陛下已周諒闇方勤萬務望崇儉德遵守前規無自矜能無作奢縱厚三軍之賜輕萬姓之徭使化育被於生靈聲教加於中外且萬國已觀其始惟陛下慎守其終思鮮克之言戒性習之漸則天下幸甚上嘉之以本官直史館車



駕北巡令知中宮名表獻宋都賦述國家受命建號之地宜建都立宗廟時雖未遑後卒從之會詔直史館各獻舊文以蒙叟所著為嘉改職方郎中景德中以足疾拜太常少卿致仕卒年七十三蒙叟好學善屬辭著五運甲子編年歷三卷子宗儒太子中書宗弼宗誨並進士及第

石熙載字凝績河南洛陽人周顯德中進士登第疎俊有量居家嚴謹有禮法宋初太宗以殿前都虞候領泰

寧軍節制辟為掌書記及尹京邑表為開封府推官授  
左拾遺遷左補闕丁外艱將起復以讒出為忠武崇義  
二軍掌書記太宗即位復以左補闕召同知貢舉時梅  
山洞蠻屢為寇以熙載知潭州召還擢為兵部員外郎  
領樞密直學士未幾僉書樞密院事詔賜官第一區太  
平興國四年親征河東以給事中充樞密副使從行還  
遷刑部侍郎五年拜戶部尚書樞密事以病足在告寢  
疾久之未愈八年上表求解職詔加慰撫授尚書右僕

射九年卒年五十七贈侍中諡元懿上為悲嘆累日且謂其事君之心純正無他適當委用而奄忽至此深為可惜國朝大臣謝事而卒車駕臨視者惟熙載焉熙載性忠實遇事盡言是非好惡無所顧避人有善即推薦之時論稱其長者初微時為養負耒嘗行嵩陽道中遇一叟熟視熙載曰真人將興子當居輔弼之位言訖不見及居太宗幙下頗盡誠節典樞務日上眷注甚篤方將倚以為相俄遘疾不起熙載事繼母牛氏以孝聞弟

熙導牛氏前夫子隨母歸石氏以熙載故奏補殿直從弟熙古幼弟熙正皆登進士第熙載撫之如一熙載卒時子中孚中立皆幼熙正患熙導以異姓居已上乃詐傳上旨令已籍熙導家財由是交訟有司歸罪熙導上召問中孚中立令有司再鞫得實熙導還本姓中孚亦養子勿問熙正坐除名上素知熙載以母故育熙導甚厚雖令還宗而不奪其官復以財產量給之咸平二年八月熙載配饗太宗廟庭熙正後至供備庫副使中孚

至尚書虞部員外郎子行簡大中祥符進士

中立字表臣年十三而孤性疎曠好諧謔人不以為怒  
初補西頭供奉官後五年改光祿寺丞家財悉推與諸  
父無所受擢直集賢院與李宗諤楊億劉筠陳越相厚  
善校讐秘書凡更中立者人皆傳之判三司理欠憑由  
司帝幸亳命修所過圖經為鹽鐵判官累遷尚書禮部  
侍郎判吏部南曹注釋御集為檢閱官改判戶部勾院  
遷戶部郎中史館修撰糾察在京刑獄以吏部郎中知

制誥領審官院又同知禮部貢舉判集賢院坐舉官不當落史館修撰罷審官院頃之復糾察刑獄領三班院歷右諫議大夫給事中入為翰林學士判秘閣知制誥並知貢舉詔中立與張觀兼行外制遷尚書禮部侍郎為學士承旨兼龍圖閣學士景祐四年拜參知政事明年災異數見諫官韓琦言中立在位喜詆笑非大臣體與王隨陳堯佐韓億皆罷以戶部侍郎為資政殿學士領通進銀臺司判尚書都省進大學士遷吏部侍郎提

舉祥源觀以太子少傅致仕遷少師卒贈太子太傅諡文定中立練習臺閣故事不汲汲近名喜賓客客至必與飲酒醉乃得去初家產歲入百萬錢末年費幾盡帝聞其病賜白金三百兩既死其家至不能辦喪子居簡至太子中允集賢校理

李穆字孟雍開封府陽武人父咸秩陝西大都督府司馬穆幼能屬文有至行行路得遺物必訪主歸之從酸棗王昭素受易及莊老書盡究其義昭素謂曰子所能

得精理往往出吾意表且語人曰李生異日必為廊廟  
器以所著易論三十三篇授之周顯德初以進士為郢  
汝二州從事遷右拾遺宋初以殿中侍御史選為洋州  
通判既至剖決滯訟無留獄焉移陝州通判有司調郡  
租輸河南穆以本鎮軍食闕不即應命坐免又坐舉官  
削前資時弟肅為博州從事穆將母就肅居雖貧甚兄  
弟相與講學意泊如也開寶五年以太子中允召明年  
拜左拾遺知制誥五代以還詞令尚華靡至穆而獨用



雅正悉矯其弊穆與盧多遜為同門生太祖嘗謂多遜  
李穆性仁善辭學之外無所豫對曰穆操行端直臨事  
不以死生易節仁而有勇者也上曰誠如是吾當用之  
時將有事江南已部分諸將而未有發兵之端乃先召  
李煜入朝以穆為使穆至諭旨煜辭以疾且言事大朝  
以望全濟今若此有死而已穆曰朝與否國王自處之  
然朝廷甲兵精銳物力雄富恐不易當其鋒宜熟思之  
無自貽後悔使還具言狀上以為所諭要切江南亦謂

其言誠實太平興國初轉左補闕三年冬加史館修撰  
判館事面賜金紫四年從征太原還拜中書舍人預修  
太祖實錄賜衣帶銀器繒綵七年以與盧多遜款狎又  
為秦王廷美草朝辭笏記為言者所劾責授司封員外  
郎八年春與宋白等同知貢舉及侍上御崇政殿親試  
進士上憫其顏貌癯瘁即日復拜中書舍人史館修撰  
判館事五月召為翰林學士六月知開封府剖判精敏  
猾姦無所貸假由是豪右屏迹權貴無敢干以私上益

知其才十一月擢拜左諫議大夫參知政事月餘丁母

憂未幾起復本官穆三上表乞終制詔彊起之穆益哀

毀盡禮九年正月晨起將朝風眩暴卒年五十七穆自

責授員外郎復中書舍人入翰林參知政事以至于卒

不及周歲上聞其死哭謂近臣曰穆國之良臣朕方倚

用遽茲淪沒非斯人之不幸乃朕之不幸也贈工部尚

書穆性至孝母嘗臥疾每動止轉側皆親自扶掖乃稱

母意後穆坐秦王事屬吏其子惟簡給祖母以穆奉詔

鞠獄臺中及責授為省郎還家亦不以白母每隔日陽  
為入直即訪親友或游僧寺免歸暨于牽復母終弗之  
知及居喪思慕以至減性穆善篆隸文工畫常晦其事  
質厚忠恪謹言慎行所為純至無有矯飾深信釋典善  
談名理接引後進多所薦達尤寬厚家人未嘗見其喜  
愠所著文章隨即毀之多不留橐子惟簡以父任將作  
監丞多才藝性冲澹不樂仕進去官家居三十餘年人  
多稱之真宗素聞其有履行景德三年詔授惟簡子郊

將作監主簿大中祥符七年冬召惟簡入對特拜太子中允致仕後加太常丞天禧四年卒賜其家錢十萬仍給郊月奉終制郊後為太子中舍

肅字季雍七歲讀書知大義十歲為詩往往有警語舉進士登甲科性嗜酒歷濮博二州從事遷保靜軍節度推官詔方下一夕與親友會飲酣寢而卒年三十三嘗作大宋樂章九首取九成九夏之義以頌國家盛德其文甚工又作代周顥答北山移文弔幽憂子文病鷄賦

意皆有所規焉

論曰張昭居五季之末專以典章譔述為事博洽文史  
旁通治亂君違必諫時君雖尚之而不能從宋興敦獎  
碩儒多所詢訪庶幾獲稽古之效矣竇氏弟昂以儒學  
進並馳時望儀之剛方清介有應務之材將試大用而  
遽淪亡儼優游文藝修起禮樂太宗尹京偁實元僚冲  
淡回翔晚著忠謹若其門族官業之盛世或以為陰德  
之報其亦義方之効也餘慶當太祖居潛歷幕府名亞

趙普李處耘及二人登用一不介意其後相繼為衆所  
傾乃能為之辨釋熙古居大任自處如寒素熙載立朝  
言無顧避喜薦善人穆以文學孝行見稱於時數賢雖  
當創業之始而進退之際藹然承平多士之風焉宜宋  
治之日進於盛也

宋史卷二百六十三

宋史卷二百六十三考證

竇儀傳拜端明殿學士從征淮南判行在三司世宗以其餉饋不繼將罪之宰相范質救解得免○臣其睿

按資治通鑑節要作世宗怒翰林學士竇儀本傳云端明殿學士是蓋端明殿五代時亦可稱翰林耳



宋史卷二百六十三考證